

928
4
6

敬業堂詩集

六



遊歷行

翠州道中

馬陵

山

敬業堂詩集卷十九目錄

敝裘集

敝裘二首

山塘與德尹別

家二瞻兄八十壽

題從孫汝誠倚劒圖二首

發揚州留別汪庚齋

夜宿邵埭

淮浦冬漁行

輓喬石林侍讀

從孫恒侯自淮安送我渡河口占志別

逆旅行

宿遷遇巡河使者

邳州道中雪

雪後風日晴暖

夜至馬陵

滕縣

嶧山二首

過兗州城外有感



冒風過東平州暮投張秋鎮

館陶早飯題壁

大風至鄭家口

戲題旅壁畫龍

野氣詩

趙北口坐冰床

白溝旅宿感舊

立春日同愷功侍講作即用敝裘二首韻

再疊前韻示愷功

讀白奪山人詩和愷功二

首

酒人集

西厓四十初度援筆爲壽兩人交誼畧見於此非

祝嘏之詞也

元夕前二日飲惠研谿寓

齋與錢玉友亮功分韻

與陳六謙戶部話舊

上元夜同唐實君趙蒙泉

宮友鹿家聲山飲姜西溟同年寓分韻得兩字

王赤孖新葺一齋名曰野航邀余對酌出詩索和

即次原韻

白田喬侍讀有家伶六郎

以姿技稱已巳春

車駕南巡召至行在曾蒙

天賜自此益矜寵庚午四月余從京師南還訪

侍讀於縱棹園酒間識之有青衫憔悴無如我

酒綠燈紅奈爾何之句時東海徐尚書射陵宋

舍人慈谿姜西溟俱在座相與流連彌夕而散

去冬北上重經寶應則侍讀下世旅櫬甫歸余

入而哭之盡哀何暇問六郎蹤跡矣及至都下

聞有管郎者名擅梨園一時貴公子爭求識面
花朝前八日翁康餽戶部相招爲歌酒之會忽
於諸伶中見之私語西厓曰此子何其酷似白
田家伶蓋余向未知六郎之姓也西厓旣爲余
道其詳竟酒爲之不樂口占四絕句以示同席
諸君

繡球花

題楊次也所藏朱北山墨
花朝實君招同西溟蒙泉

研谿西厓友鹿聲山寓齋雅集分韻得過字青
字

料絲燈史畊巖學士屬和即次原韻四首

友鹿寓居孫公園與實君蒙泉崑木同巷僕及西

溟聲山相距稍遠友鹿作比隣詩二章亦來索
和因次實君韻奉荅

友鹿復次韻見寄恐其有過督司闢之意再疊韻
解之二首

盧樗菴七十壽詩

送勞書升通政養親歸里

豆腐詩和楊芝田宮坊四首

問西厓病

戲題曹希文寫生蒲萄冊

再題朱北山所畫松鼠蒲萄

爲次也題秋花小鳥畫卷

研谿傳札訂望後出郊看杏花夜來微雨恐阻茲

游晨起風日清明喜而有作

送畢雨稼

三月十六日同西溟實君

蒙泉研谿六謙耑木石城友鹿永年向濤霜田
亮功次也南陔至興勝寺看杏花三首

看花之會已成七律三章朝來耑木分牋屬賦

七言歌行再作一首

狄向濤庶常訂同人會飲海棠院是日僕適有他
招別請卜期研谿以詩相惱戲荅之

三月晦日向濤治具招同西溟實君文饒研谿六
謙耑木霜田亮功次也南陔岱瞻宗岱社飲寄
園向未與會而今至者則胡芝山周漁璜張天
門陳堯愷姚君山玉階兄弟

陸澹成侍讀招飲丁香花下同西溟崑繩寄亭作

何倬雲戶部招諸同人飲藤花下

四月八日飲劉雨峰新寓分韻得佳字

題張浦畫太白像 題張儀山中丞溫陵紀事

後 贈范方仲

為翁景文題畫 宣德素鼎歌為山左李繩

其作 翁康飴寓齋看芍藥分韻

得回字 送趙二聞郎中分巡兗東

二首 送鄭禹梅郎中出守高州

三首末章兼示茂名宰王令詒

送陳梅溪之任階州二首

古詩五章呈吉水大司農李公

次也讀書王園夏日偶過之索詩題壁

虞山嚴杏修爲尊人仲甫先生乞六十壽詩并以

錢湘靈玉友亮功所賦五七言長篇見示故詩

中並及之

酬同年張聲百秦中見懷

之作

以詩乞王麓臺給諫畫山

水附次韻

麓臺次韻見訓再疊前韻

王服尹見和乞畫詩三疊前韻奉荅

計開昭索題看菊圖 題曹渭符舍人畫扇

費子葛陂屬題小影 題趙天羽給諫小照

送同門朱介垣掌科請假還吳

希文將南歸次淵明田居詩韻來索和章四首

敬業堂詩集卷十九目錄 終

敬業堂詩集卷十九

海寧 查慎行 悔餘

敝裘集

起甲戌十一月終十二月

入都凡三度多在春夏之交未嘗從風雪中跨驢也甲戌重陽後自金華歸里兩接愷功札促余北行遂於長至前五日束裝一羊裘已十五年裘則敝矣而行役尚不知止可嘆也

敝裘二首

中道誰能便棄掬蒙茸雖敝省裝綿曾隨南北東西路獨結冰霜雨雪緣布褐不妨爲替代綈袍何取受哀憐敢援齊相狐裘例尚可隨身十五年

冷暖相關老倍知黑貂何必勝羊皮留同敝袴非無用
好比緇衣或改爲取醉難償村店值有人還當釣簑披
家貧舊物無多在不忍吹毛更索疵

山塘與德尹別

歸何草草出匆匆聚散全非意料中長路一痕添日綫
是日征衣幾縫裂霜風未論去國經年別且喜停舟五
冬至夜同記取欲眠頻坐起半塘橋北虎丘東

家二瞻兄八十壽

我觀造化初無權仁者自壽其天全老翁小兒兩遊戲
直以渾沌還吾天不爲物用而用物歎洩元氣成雲烟
古來絕藝兼者罕鍾王顧陸名各專輞川摩詰書未稱

三絕獨數滎陽虔眉山海嶽不復作松雪兩派猶相沿
先朝倪沈及文董筆力亦足追前賢吾兄妙手靡不備
書法入聖詩能仙偶然點染作圖畫別有天授非人傳
興來百紙一掃盡散去半落雞林船貴游踏破鐵門限
欲乞尺幅終無緣有時自銘退筆冢經歲或乏看囊錢
乃知此事因品重兄豈自負人云然維揚地薄耆舊少
流寓欲占文星躔今年九月屆大耋初度恰在重陽前
一門諸弟頭盡白謂楷五秋茱萸醉插隨兄肩羨兄晚
山兩兄節比彭澤祝兄添丁如玉川兒年二十翁百歲及看舞
袖黃花邊

題從孫汝誠倚劔圖小影二首

楸具橫腰首，祿巾天然秀。骨出風塵乃，翁已被從軍。誤

傷尊公 荆侯 勸爾休為佩犢人

羲獻門風世共推 汝誠為二瞻 兄嫡姪孫 階庭蘭玉總多才。自言

劔術通書法，曾看公孫妙舞來。

發揚州留別汪庚齋

旅况殘年最不堪，何期解后作深談。向風嘶馬程程北，背雪飛鴻片片南。殘燭乍移寒減半，征帆欲挂酒行三。隋堤柳態禁搖落也，傍汪倫百尺潭。

夜宿邵埭

水柵千家市，烟村十里橋。蘆灘聲雪雪，燈舫影搖搖。風止鷗機息，寒深酒力消。獨眠無好夢，愁度最長宵。

淮浦冬漁行

長淮冬涸成溝渠，風雪夜折荒洲蘆。小船冲冲鑿冰去，水面躍出黃河魚。衝寒捕魚作漁戶，手足皸瘃無完膚。三時轉徙一冬復，淵藪偶寄蝸牛廬。無田不得事農業，有水尚欲輸官租。自從十年淮泗滿，平地地下受滔天。湖誰驅鱗介，食人肉漏網。幸脫鸞刀誅，得時鼃鼃聚窟宅。失勢魴鯉充庖厨，眼前竭澤有餘憾。取快報復聊須臾，但看明年春水上。魚鰲又占居民居。

輓喬石林侍讀

本朝治水關全局，東下狂瀾勢難復。先生獨以手障之，言卒施行身蚤逐。微車北去全家懼，昇觀南歸萬人哭。

百年陰德被淮揚公在九原應瞑目

從孫恒侯自淮安送我渡河口占志別

吹斷西風雁一繩離情鄉思兩曹騰醉衝白日孤城霧
曉渡黃河十里冰去意隨蛇遮不住識塗如馬老偏能
未應輕別淮南路隻影從挑夜夜燈

逆旅行

用王半山
轉韵體

行人為客居人主聊以稱呼代爾汝入門不揖出不辭
主今知客却為誰等閒無事休為客幾個相逢尚相識
相逢相識非不多賢於逆旅能幾何

宿遷遇巡河使者

使者冬行水居人歲避河甃時停畚鍤何計脫風波賦

斂殘年急隄防下策多皇華期盡職報稱意如何

邳州道中雪

野濶黃河岸天低下相城幾家沙際沒單騎雪中行漸
壓輕裝重俄添老眼明路難兼歲晚那免嘆孤征

雪後風日晴暖

陰霾一夕解重圍頓覺朝來朔氣微得暖渾如杜康力
殺霜終是趙衰威細流飲馬知冰釋殘雪隨風作絮飛
至竟村翁勝行客茆檐晴晒木棉衣

夜至馬陵

苦霧噴沙氣若蒸荒程月黑夜無燈前岡十里黃茅路
野火光中見馬陵

滕縣

客從宿遷來日日灌莽裏今晨到滕縣孔道平如砥民
居稍稠密田野亦耨理疎樹排棗梨短樊插棘枳雞豚
飯商賈葱薤飽婦子居然似樂國以彼乃形此滕當戰
國時褊小五十里自從置郡邑其大實倍蕞縣令視諸
侯提封非昔比西南際蕭沛豁達開顧指回頭淮泗郊
窪若陷井底可憐百萬戶頗爲蛟鱷徙山東地勢高厥
患不在水所期一尺雪二麥青可起

山左自四月至今苦旱

嶧山二首

秦岱分餘脈差堪比附庸祇因生下邑讓爾作奇峰

作俑何人始吾將罪李斯如今山上石多刻去思碑

滕鄒

之間丞尉以下俱勒石頌德政

過兗州城外有感

泗水橋西路垂鞭去意遲老爲東郡客才減少陵詩白
日黃塵暗孤城萬木悲遺民應已盡莫問亂離時

冒風過東平州暮投張秋鎮

沙旋頭疑眩聲喧耳欲聾不愁衝凍雨直怕遇狂風土
銼煤烟黑爐灰豆火紅老妻加被絮今夜奏奇功

館陶早飯題壁

楊椿迷野岸棗刺拒城壕小縣門常閉紆途僕告勞半
窗東日暖一飯北風饕聊記吾曾到留詩過館陶

大風至鄭家口

黑雲奔騰西北來平地忽陷山疑顛簸揚砂礫作糠粃
雜以萬斛葭蘆灰陽鳥退飛翅摧折天狗下墮聲喧
千年樹拔虎豹窟四海水立蛟螭堆我行到此迷失道
馬立岐路鳴徘徊意中了了識村落目所未見終疑猜
夕陽乍吐鄭家口豁若明鏡函初開半年遊跡入醉夢
下馬更盡當風杯

四月十五夜奉陪徐座師於此地看月故結處及之

戲題旅壁畫龍

誰言尤物性難馴長養方成爪角鱗畫手不然爭貌得
可憐曾傷參龍人

野氣詩

朝陽射北陸野氣何迷濛忽生無根雲幻作有影風

云水波去羃羃村烟封千林皆動搖四顧爲虛空我聞
氣升降閉塞方成冬而此從何來吹萬將毋同大哉古
今宙都攝一氣中鉅者運鯤鵬細或吹蟻蠓試從一身
論可以究始終恢恢賢聖途剛大秉降衷養之塞兩間
浩然靡不充若者爲正氣仁義澤厥躬反是則爲邪百
感交外攻五事協五行輕清秀所鍾不鑿渾沌竅自然
得玲瓏若者爲清氣視明旺亦聰反是則爲濁人心有
盲聾生氣眇初發萌芽葆菟蒙不敢輕散抒所以厚蘊
崇若乃礪咲刃旁開騁談鋒是名曰殺氣取快誰見容
朝氣爽且朗古鑑磨青銅不事察察明謙謙與人恭其
或長傲慢鴟張徒子雄是名曰暮氣衰至驕必叢凡此

機相關動與呼吸通不知野氣者其類當奚從或如葭
蘆灰候至應管筒或如古井水冬暖冰常融然而無附
著所向皆游蹤於人似客氣往來日憧憧熏面使黧黑
醉顏發狂紅移之入釜鬻饋餽侈然豐移之襲官骸咳
嚏歎霾霽又疑天壤內物理難終窮蒸沙詎成搏煮石
豈得鎔受性不受氣造化誰尸功不如且坐睡萬象歸
朦朧

趙北口坐冰床

古堤老柳一時僵水腹初堅黑白洋稍與長途休馬力
冒寒半日坐冰床

白溝旅宿感舊

南北勞勞已十霜瓦橋關外又嚴裝今宵新月入窗早
去日小鬟如我長斑髮重來無伴侶甲子入都同錢玉
友翁樹服已巳則

家次谷陳元之庚午春同姜西溟南歸
甲戌復偕翁康給輩北上皆宿此店舊題幾字失偏

菊燕南酒美魚羹賤不解愁人獨憶鄉

立春日同愷功侍講作即用敝裘二首韻

土牛寒氣漸應捐猶戀征袍未拆綿東閣探梅還有信
西堂夢草獨無緣憶德
尹春生帝里如相就老傷侯門越
可憐南去北來成底事暗消髀肉是今年

逝水流光黯自知依然一室對烏皮冰將釋硯真吾幸
雪可搏獅任客為老柳受風終蕲約孤松經凍太離披
詩從鍊後鋒銚出正要旁人摘小疵

再疊前韵示愷功

半生習氣老來捐，熨貼終輪裹鐵綿。
 待兔祇疑株可守，求魚方悔木難緣。
 偶然鴻爪留還去，果否蛾眉妬是憐。
 一種東風消不得，鬢邊霜雪又增年。
 海内人才略可知，也曾高會與南皮。
 三年刻楮將安用，一技雕蟲壯不爲。
 酒市天寒愁客散，書帷晝靜喜人披。
 與君相對春風裏，只有冰壺不掩疵。

讀白奪山人詩和愷功三首

亭長臺邊一酒徒，仰天故作大聲呼。
 氣驕星宿生芒角，手擘山川入陣圖。
 急縛何人櫻怒虎，叢祠有鬼托妖狐。
 眼空江表衣冠族，搖筆猶堪殺腐儒。

人謂狂生本不狂，漆身吞炭事何常。
 亂餘賓客搜亡命，赦後英雄耻故鄉。
 寶劍塵封三尺水，麻鞋寒踏九州霜。
 隨身一掬瀾翻泪，不哭窮途哭戰場。

一卷頻浮大白開，即論詩句亦雄才。
 到天峭壁千尋立，破浪長風萬里來。
 石火光中亡國恨，鐵函井底後人猜。
 可憐芒碭無雲氣，山色於今死若灰。

酒人集

起乙亥正月盡六月

甲戌偪臘抵都偕家聲，山儻居宣武門外與姜西

溟惠研谿寓舍相望，自新年始約爲詩酒之會。吳

中則唐實君趙蒙泉海陵則宮友鹿七人而已。湯

西厓錢木菴亮功兄弟時或一至，後益以翁康飴

陳六謙狄向濤楊耑木稍爲好事所傳他有宴會
牽率入座大約月必有集集必有詩聲非擊筑名
托酒人各有取爾也

西厓四十初度援筆爲壽兩人交誼畧見於此
非祝嘏之詞也

甲子夏五月我初客燕山逢君槐樹街披豁示肺肝君
時二十九譽滿公卿間我長慙七年姓名尚泥蟠居然
荷兄事齒序非所安因緣求友生稍使徑路寬寧知遇
秋賦則足同蹒跚古寺郭西門頽虬柿垂丹霜天夜蕭
槭落葉堆空欄男兒屬有才九萬絲鵬搏向來輕薄子
洗眼爭相看我時仍失意寸進弓難彎不敢怨窮途借

君激頽頽長恐命運薄終身比劉瓛

音桓

皇天困斯人日

月雙跳丸丘壑閑雲霧江湖駭驚湍側聞夙昔遊一一

趨金鑿如君尤聳拔刷羽超鵷鸞落筆中書堂集賢群

聚觀大官饌常賜內府金頻頒 至尊賞文辭步接螭

坳班猶能念微賤枉札來榛菅感君期我深暴棄難自

拚勸我舉京兆送我赴春官憐我下第歸臨岐話悲酸

誰當旣得路枯菀仍相關長途冰雪交鶴語今年寒還

家席不暖又鞞衝風鞍人皆嗤此來此來豈無端君年

適四十正及叨杯杓君壯騰青雲我衰改朱顏詩成非

善頌聊記平生驩

元夕前三日飲惠研谿寓齋與錢王友亮功分

韻

春寒半月透重繻曲巷層冰凍尚堅策蹇人尋行樂地
快晴天趁挂燈前侵陵白髮違歌酒惱亂朱門涕管絃
誰似閒官能愛客朝衣典去作新年

與陳六謙戶部話舊

二十年前兩酒人京華相見意尤親田園蹔返如孤客
邸舍翻來作近隣難就微名成我懶未除宿習取君真
狂言自駭家僮聽誰識忘形舊主賓

上元夜同唐實君趙蒙泉宮友鹿家聲山飲姜
西溟同年寓分韻得雨字

北風未解嚴刮面射強弩富兒馬足塵游子衣上土我

有同年生一椽望衡字每因赴燕會暫得命儔侶時節
近上元滿城竟簫鼓公卿例名客僕指畧可數燭幌白
生虹燈屏紅窳堵空明大圓鏡爛熳散歌舞可憐玉川
居破屋用茅補荒庭一堆雪月色帶清苦也復呼其群
經營同地主不辭口腹累爲愛風義古酒行爵踰三斛
列簋倍五先生鄙肉食下箸輒欲吐如何點食單亦溷
烹魚釜

西溟性不嗜肉或誤食必以清水灌盥而盤餐乃具此味即此毋已奢誰能

諒貧窶我窮興蕭索藉爾作豪舉雅令既匝巡毋陣捲
風雨主人但旁觀堅坐恣狎侮肯爲餅告罄相勸力須
努新詩信手成險韻鬪虢虎費君三月俸醉我一夕許
忽聞耳熱歌寒律變溫煦

王赤抒新葺一齋名曰野航邀余對酌出詩索
和卽次原韻

忘機到處總虛舟別起齋名借櫂頭已是除塵得瀟洒
若教臨水更清幽兩三人可同君坐五六年應爲此留
閒殺鷗邊好風景荷塘宜夏蓼宜秋

白田喬侍讀有家伶六郎以姿技稱已巳春

車駕南巡召至行在曾蒙天賜自此益矜寵

庚午四月余從京師南還訪侍讀於縱棹園酒
間識之有青衫憔悴無如我酒綠燈紅奈爾何
之句時東海徐尚書射陵宋舍人慈谿姜西溟
俱在座相與流連彌夕而散去冬北上重經寶

應則侍讀下世旅櫬甫歸余入而哭之盡哀何
暇問六郎蹤跡矣及至都下聞有管郎者名擅
梨園一時貴公子爭求識面花朝前八日翁康
飴戶部相招爲歌酒之會忽於諸伶中見之私
語西厓曰此子何其酷似白田家伶蓋余向未
知六郎之姓也西厓旣爲余道其詳竟酒爲之
不樂口占四絕句以示同席諸君

鬢影衣香四座傾風流爭賞米嘉榮就中獨有劉賓客
曾聽涼州意外聲

鴨桃花外小池臺瀲灩觥船一棹開春色滿園人盡妬
君王前歲賜金來

敬業堂詩集卷十九
十一
一群穠艷領花曹頭白尚書與最豪記得送春筵畔立
酒痕紅到鄭櫻桃

茶烟禪榻隔前塵存歿相關一愴神自琢新詞自裁扇
教成歌舞爲何人

題楊次也所藏朱北山墨繡球花

春風壓簾吹不動簇蒂攢密無縫美人纖手搓欲圓
嬌鳥一梢低更重駢枝倒挂玉蕊仙暖氣散作藍田煙
粉痕洗盡墨光出自有此花無此妍

花朝實君招同西溟蒙泉研谿西厓友鹿聲山
寓齋雅集分韻得過字青字

二月無花看今年雨雪多不辭官獨冷翻喜客頻過洒

掃門庭潔芟除禮法苛愛君新句好諷諭擬元和
客久頭垂白交深眼倍青坐銷愁裏日來聚酒邊星假
借通隣曲盤餐及使令春郊花事近後約更旗亭

題項霜田讀書秋樹根圖

讀書未必皆識字涉獵耳目爲窮探此生枉伴蠹魚老
飽蝕卷帙寧非貪文成有韻或吞剝事出無據徒撻搏
孰從牙後拾王李纖入毛孔求鍾譚橐駝馬背所見少
自享敝帚矜著簪雷同不滿識者笑人盡能此燕無函
蘭苔翡翠稍秀異什伯略可數二三時情祇取供近玩
崇雅刪鄭誰能諳我持此論衆大怪相戒勿聽無稽談
廿年硯田困衣食撥置夙好隨嬰媿排辭偶句受人役

渴飲墨汁同潘泚有時間作崑強語蓼辛荼苦終非甘
項生乃有嗜痂癖謬辱推許張顛顛謂余頗可附同調
與別白黑分青藍君才於世故無匹氣象外拓神中含
屢遊京洛結文社獨向魯國稱竒男空拳亦足搏犀兕
大鼎詎止容罍甒一鞭入海走巨石千丈倒壑回枯枿
逍遙鸞鶴控紫極活潑魴鯉游澄潭才高氣盛心轉細
獨繭一一絲抽蠶問君此境豈易到確有階級難窈參
向來正得讀書力閉戶萬卷曾沈酣源流正變瞭指掌
北斗在北南箕南光開飛電十行下機發伏弩千鈞擔
搜竒抉險富詩料然後所向無矛鏃庭空樹老得秋早
霜色染葉黃於柑一編信手愛露坐何用白石藏書菴

命工作圖索題句劇壘相對吾奚堪遇君尚應三舍避
君愈降氣余彌慙詩成乞與摘紕繆蹇鈍猶異隨驂驛
此間風景有何樂曷不歸去同書龕

料絲燈史畊巖學士屬和即次原韻四首

勿論萬縷與千絲似密還疎製絕竒玳瑁筵前凝作片
珊瑚網底爛生枝華堂金屋年年換錯綵粧花種種宜
表裏孤光原洞達曹騰醉眼任斜窺

宛宛長廊小院東藕絲不斷望疑空巧穿針孔玲瓏影
吹透冰肌綽約風簾幙花深長帶霧畫圖山淺忽生虹
琉璃太脆紗紋薄獨愛韜光黯淡中

更從何處着纖塵亞字文迴古錦茵斜拂楊條藏語鳥

密牽若綫過游鱗顏筋柳骨書家格吳帶曹衣鏡裏身
併作清輝開四照不勞明月吐芳津

駢枝儷葉技同稱點墨何愁誤不與射角星芒殊睽睽
照人風骨自稜稜金波蕩月成方折玉氣生烟隔幾層

還與石湖添紀事詩家新賦料絲燈

范致能有上元吳中紀事長律所載

燈名甚多獨不及此品

友鹿寓居孫公園與實君蒙泉柴木同巷僕及

西溟聲山相距稍遠友鹿作比隣詩二章亦來

索和因次實君韻奉荅

馬蹄纔過又車輪廣術相逢亦太頻不惜往來隨步履
預防倡和損精神過墻濁酒能供客鑿壁餘光倘借人

便與中央成鼎足姜居西舍我東隣

造門不見等離居俗例持牢急破除

一條申典謁客談幾處省傳書巷連畢曜宜相就雨過

蘇端肯見疎添取新篇爲日課與君直似共鄉閭

友鹿復次韻見寄恐其有過督司關之意再疊

韻解之二首

過門何止十朱輪只有窮交不厭頻語帶滑稽吾是戲

繁清摘發爾如神犬應勿拒重來客花亦爭窺舊識人

從此得閒須徑造巷南巷北總芳隣

老屋西頭勝僦居門前無草不須除未妨排闥來驚臥

且喜還瓶肯借書踪跡漸同詩境熟形骸終要禮文疎

偶佐村沽亦足豪烹雪也宜施翠釜割雲初不費銀刀
胡麻別試山僧法口腹窮奢笑老饕

茅店門前映綠楊一標多插酒旗旁行厨亦可咄嗟辦
下箸唯聞鹽豉香華屋金盤真俗物臘糟紅麴有新方
須知澹泊生涯在水乳交融味最長

問西厓病

小閣藤牀勸獨憑門前仍遣小僮磨一家多累愁何益
四海無醫感又增春酒呼兒看滌器夜甚留客對挑燈
可知七發真良藥莫謂先生病未能

戲題曹希文寫生蒲萄冊

東郭鹽咸陽冶朝入羊暮騎馬生不願封萬戶侯亦不

願領西涼州但願蒲萄垂乳比桑甚日日飽噉只學林
間鳩若使一官值五斗家家爭釀蒲萄酒枝頭無紙上
有誰能截取老僧手

圖為鑿上人
所畫

再題朱北山所畫松鼠蒲萄

兒童把竹竿飛鼠未可逐暮四復朝三蒲萄秋正熟縱
使身輕化蝙蝠可憐兩翅仍兼肉枝頭漸空莫緣木明
朝去竊官倉粟

為次也題秋花小鳥畫卷

一株鴨脚葵色映紅黃紫雞冠似經鬪碎葉垂披靡無
端青螳螂失勢忽落此當其奮鬪時寧料草間委飢禽
不汝貫集啄紛爪觜似為蟬復仇反覆乃物理二蟲何

厚薄是亦可以已我欲解其圍毫端呼不起

研谿傳札訂望後出郊看杏花夜來微雨恐阻

茲遊晨起風日晴明喜而有作

臥聞檐雨滴堦鳴意外東風曉放晴為作報書真早起

門前吹過賣花聲

送畢雨稼

古藤花底逢朱十為我長吟畢四詩滿眼酒徒星散盡

送君還憶識君時

余初識雨稼於竹垞先生寓

三月十六日同西溟實君蒙泉研谿六謙耑木

石城友鹿永年向濤霜田亮功次也南陔至興

勝寺看杏花三首

弄袖風微不起沙野田分路走三鷗十年失計仍為客

一醉無名特借花白塔似招遊子騎青旗錯認美人家

金丸落處休輕逐小立逡巡避鈿車

先經摩訶菴不得入

幸是韶光處處同勝遊隨意轉芳叢別開香界松林外

遙指烟村杏社東黛色濃添三面綠日痕微減一分紅

只須十步凌丹閣多少花頭在下風

及記當時載酒遊舊題幾壁拂塵留重隨客到僧猶識

不待人言我欲愁牧笛聲中芳草路鞭絲影裏夕陽樓

花開花謝年年事豈料傷春易白頭

看花之會已成七律三章朝來耑木分牋屬賦

七言歌行再作一首

朝陽簷前報乾鵲起赴城西看花約東家借得蹇驢騎
 快比揚州身跨鶴豁然雙眼對明鏡草樹無塵光躍躍
 倚牆初見一桷紅掩映垂楊作村落漸行漸遠入佳境
 花海茫茫浸樓閣雲晴霧散天微霞日色烟光互迴礴
 自然得氣少人妬縱使餘寒何處着卯酒油來玉頰鮮
 牙香熏透春衣薄蝶沾葢粉或雙去燕拂花鬚時一掠
 乍看半吐或全開百面疑聞腰鼓作因思前夜沾沙雨
 特為催花龍起壑不然万本及千株那得同時齊破萼
 此花舊是仙家種肯向人間傷簾箔自從禁苑植樊籬
 已勅居僧司鎖鑰寺後為進御菓園兒郎避路敲巾帽嬌女窺
 隣少媒妁可憐寂寂寄空園也似飄飄客京洛憶昨初

來年尚壯歡場往往貪酬酢松林古寺摩訶菴幾度陪
 遊履相錯乙丑丙寅間屢隨大司空朱公少司馬楊公遊此侍郎歸老尚書歿
 前輩風流久寥廓我留紫陌十經春白髮隨梳旋墮簪
 去年三月曲江宴橫路紛紛爭出郭此時緝穰更思鄉
 未免當春懷抱惡豈如今年風日佳得喪心空別開鑿
 青袍莫漫感憔悴紅袖羞堪慰淪泊楊家公子好心事
 兩世交情宛如昨已逢勝侶盡名流况是閒官能脫略
 雖云雅集忘賓主治具終煩佐脾臆是日端本治具花前醉倒
 十五人坐有車公寧不樂歸來忽忽記前夢後會悠悠
 付成諾禪房借榻眠海棠野圃穿畦行芍藥勿嫌生活
 太冷澹竿木逢場聊戲劇只愁火急促新詩頽謝方將

被陵轢尋花本意取陶寫覓句翻教困悉索直須境過
兩相忘滿紙陳言總糟粕

狄向濤庶常訂同人會飲海棠院是日僕適有
他招別請卜期研谿以詩相恼戲荅之

一春命侶原多暇半日看花奈少緣我為顏唐姑避席

讓君獨作海棠顛

出劍南集

三月晦日向濤治具招同西濱實君文饒研谿

六謙崱木霜田亮功次也南陔岱瞻宗岱社飲

寄園向未與會而今至者則胡芝山周漁璜張

天門陳堯愷姚君山玉階兄弟

客居感節物鄉味想櫻筍及此問名園忽驚春向盡歎

鞍垂柳外曲徑紆徐引側帽入丰茸迴身轉欄楯群賢

次第到虛坐前後盡

出曲禮讀上聲俗作儘

衆芳如媚客四顧少

畦畛丁香垂紛披藤蔓縮菌蠢海棠不少待吹作胭脂

粉那無水一池鼓吹出蛙黽似嫌太寂寂作意破寒窘

鯨波捲百川目眩空花墮亭臺亂金碧有若浮海蜃日

飲正無何老狂良足憫唐侯但坐視出語顧見哂余與天門

亮切鬪酒盡酣實君有老馬入駒群之戲

幸無性命憂何用須臾忍春衣行

且換紅藥期將近三百青銅錢敝裘尚可準

陸澹成侍讀招飲丁香花下同西濱崑繩寄亭

作

花繁葉密暗迴廊為放庭空特撤牆翠幕雲遮天四角

紅燈人醉樹中央春辭小院離離影夜受輕衫漠漠香
曾是往年連榻地重來容易感流光

丁卯巳巳間與家
荆州兄盤桓此地

最久故
及之

何倬雲戶部招諸同人飲藤花下

前日飲寄園自辰徑終酉連朝發酒病解醉仍思酒一
笑赴佳招相逢復開口入門庭宇曠槐蔭寬半畝高格
架藤花有若魚貫柳其梢多倒垂其蔓必上走蛟螭起
擎攬纓絡飄絲絡翻愛急雨來不嫌濡我首殷勤得賢
主諧謔因良友衣上指唾痕花前傷老醜人間好亭館
豈必皆已有但願興到時深杯長在手

四月八日飲劉雨峰新寓分韻得佳字

十年論舊雨一日破清齋

俗傳浴佛日

去覺流光速來貪小

住佳

時出乙丑讌集詩卷見示

槐陰深小巷花氣近斜街早晚南舩

到重看酒似淮

題張浦畫太白像

芒角生酒星仙才謫人世清平三絕調醉裏一噴嚏可
憐高將軍不中作僕隸脫却夜來鞞飄然從此逝

題張儀山中丞溫陵紀事後

見說溫陵事安危繫一時潮頭開郡縣虎口奪嬰兒報
國原臣分封侯豈數奇置身如事外不勒紀功碑

贈范方仲

秋兔千頭瘞禿毫鋒藏鏢欵似無刀費他京國三年住

頑石如山價盡高

爲翁景文題畫

綠蕉葉折風無賴紅蓼花垂雨不情一個草蟲鳴似訴
故來紙上作秋聲

宣德素鼎歌爲山左李繩其作

西方金苗變黃白躍冶辰砂歛成赤神工范出形製奇
不用雷紋鑿饕餮腹圓口直中央斂一綫縈腰起凹凸
其高四寸下半之其厚三分芴稍溢以衡測重斤踰二

宣德小爐重者
不過二斤四兩

以指量圍弓滿的寶光蒸出耳雙環濃
乳垂爲足三隻膏流似覺層波涌肌潤何愁熾炭炙瓊
瑰碾紫柔作團韎鞞凝紅嫩將滴照來妖魁敢逃影吹

過雲烟不留跡神光離合乍陰陽氣候盈虛異晨夕世
人好古搜彞敦耳目遺亡闕金石此鼎傳從宣德年居
然上與商周匹國家元氣在宇宙百鍊千鎔聚精液後
宮侍女罷添香講殿中宵尚前席曾從天上拂袍袖一
落人間似淪謫忽經吾眼真可憐尤物無多增戀惜君
不見城南片雨朝來急電掣金蛇飛霹靂玉川破屋那
許留万丈光芒穿四壁

翁康飴寓齋看芍藥分韻得回字

都城洵繁華物色互矜銜豐臺紅芍藥千畝開芳甸嗟
爾本名花因多乃致賤半開遭天闕不許遊人看却被
賣菜傭頃筐雜藜苳根株兩相失本性須臾變相逢衢

荀詩言卷一
陌中識者爲一泫翁生官戶部郎舍如郵傳近移槐樹
街意取買花便連車載兼土愛護同婉孌小雨爲扶頭
清泉與醜面瓦盆三十六手自摩挲徧亞窗斑竹欄步
障青油綸花如感知遇爛熳答深眷其大比盤盂或歌
學團扇高低隨所主向背視所戀負恃各爭妍誰能分
最殿豈無一尊酒就汝諧終宴未免爲紅筵經營好希
簞書生例貪嗇耳目有歆羨學道吾未能紛華易交戰
有情且相對即事驚稀見絕勝洛陽園花時閑深院

送趙二聞郎中分巡兗東二首

望郎才地早知名檠戟新臨古任城負弩三州迎刺史
降階一揖禮諸生山連翠岱雲常潤濟入黃流派獨清

我是南池舊遊客送君不覺動吟情

君家邸第好園林槐柳周遭十畝陰子舍縱牽他夜夢
宦遊何負老人心共傳清節胡威絹自有家風趙抃琴
此去國門看擁傳拾遺親授大官箴

送鄭禹梅郎中出守高州三首末章兼示茂名

宰王令詒

高涼名宦自來無君到方能重此區不信試徵唐宋事

潮州韓與惠州蘇

八十高堂兩白頭扶攜齊赴上龍舟荔枝龍眼均珍膳

不要同官易播州

時范國雯得
延平故及之

曾依日影候花甌此去人情似左邊猶勝茂名王大尹

脚靴手版謁同年

王與鄭皆戊辰進士而茂名爲高州屬邑

送陳梅溪之任階州二首

一家鼎盛十朱輪仕籍君偏比積薪早歲科名曾入洛

半生官况兩遊秦

陳前任綏德州牧

時平不設當關戍路僻稀

逢入蜀人鄧艾城邊閒草木也教窮谷識陽春

一官聊與俗沈浮不改頭銜計亦優稍喜分符同領郡

敢論無蟹有監州重關夜度群雞月絕塞書來斷雁秋

多少郎潛愁索米羨君已似跨青牛

古詩五章呈吉水大司空李公

盛治際中天六卿盡文獻發揮爲事業器量隨所建公

雖長冬官其氣實涵萬放之彌宇宙舒卷視膚寸道在

本非夸逢時獲初願

百川日東注赴海同一門豁達意何廣函容道彌尊乃

知延攬塗中有仁義存清濁具本性澄觀得其源君看

下成蹊桃李初不言

西江一瓣香自昔人文區歐公門下客磊落皆名儒千

秋復代興隻輪賴公扶官高能下士此義今人無

空谷有幽蘭披披自含芳一朝采而佩顧盼滋容光顧

盼何足多貴登君子堂識者或見賞當門忌孤芳向非

特達知標榜慙互相

男兒感恩地茲事豈可常不敢泣窮途恐爲知己傷拙

守無詭遇異營戒岐旁百年屬有身利鈍誰能量於公

負期許脈脈終難忘

次也讀書王園夏日偶過之索詩題壁

地僻人聲覺林深曉氣通棗花開帶刺藤角隨兼蟲擊
柝過佳客傳餐累小僮避炎知有處來就北窗風

虞山巖杏修為尊人仲甫先生乞六十壽詩并
以錢湘靈玉友亮功所賦五七言長篇見示故

詩中並及之

吳中數交遊屈指首嘗熟錢生十年舊直以心置腹因
之筮同人京洛異徵逐初逢嚴伯子氣靜神冲穆涯涘
未易尋徐徐視含穉名駒果有自孺染出家孰子有兩
老親筭旬竝踰六昨歸為上壽再出何太速所傷名未

成負米營斗斛此來復相見執手語反覆為言屏幃詞
排偶難破俗人間好官爵祇用填滿幅不敢濫乞言所
以省干瀆君詩有真味是則我所欲出示三長篇得隴
且兼蜀孝廉筆奇矯榦老枝葉禿交情叙三世中有滄
桑錄大錢善形容繪畫列眉目小錢騁才氣汎濫到朝
局已無餘地留故乃相迫促吾詩何處著譬若蛇添足
然而難固辭即事生感觸江南氏族盛甲第紛相屬寧
知一再傳竟為他人卜君家好門閥墻宇本先築豈非
文靖公清蔭及喬木仲甫為相國當時歸逮養歲給大
文靖公曾孫官祿人生惟此難餘者徒鹿鹿即今時代換往事如轉
轂正賴後人賢流風承式穀先生實高隱祭酒推鄉曲

雖荒下溼田尚保檀橋屋時情有豪奪世守無輕鬻冬
缸葑可熬秋圃棗堪剝窺池荷夏紅掃徑莎春綠平生
十萬卷又課諸孫讀同牢四十年尚享齊眉福子行及
歸奉此樂天倫獨古人重名義飲水兼啜菽斯言倘足
徵庶當嘏辭祝

酬同年張聲百秦中見懷之作

舉子稱同年厥名自唐始其初本鄉貢往往維桑梓地
近情易親論年序以齒師門就行列有若一父子名雖
托友朋骨肉差相儼至於試京兆半屬九州士或者徇
虛聲紅箋報名紙泛交乍隨俗相背旋棄疑刺盾動以
矛憑身孰如几余生久落魄場屋困別趾初度降惟寅

微名歲在癸秋蛾眉換綠看鏡抱深耻得附當代賢不

才聊自喜君家好兄弟

令兄逸峯亦同榜

健翮冲天起竇桂有

雙枝田荆必連理京華獲交髀伐木酒親醜古道朗照
顏相期各劇壘嚴霜妬竹柏猛雨欺桃李散作湖海萍
流行隨坎止省親君就道落第我歸里關城杳何窮秦
樹吳雲裏何期再入洛冰面躍雙鯉寄示長歌行光芒
開顧指聳身登二華長劍插天倚黃河如修蛇起伏見
首尾自然得竒句萬象聽驅使我欲從之遊塵埃誰料
理矧慙詩力弱難與諧宮徵遲答故人書半年坐嬾耳
以詩乞王麓臺給諫畫山水

婁東富文獻世守鄴侯架太原老奉嘗腕底斡造化當

年書畫蹟貴豈文董亞至今賢子孫餘韻足瀟洒黃門
蚤登第群從俱方駕朱紫接烏衣丹青陋曹霸朝廷無
闕失邠舍多清暇坐令拾遺官風流資醞藉時時出餘
技落筆妙天下屏幃滿京華林泉不吾借篋中一幅紙
欲乞防見詫生平山水緣無厚入有罅搜竒得餘快歷
險慣不怕所媿言少文烟雲經眼乍如何不自量見彈
求鴉炙意從良友申間請掖垣假朝來傳好語命以詩
易畫余以宣德紙從吳元朗轉乞君畫君語我詩頗拙
元朗是不可無夏重詩來則畫往矣速敢托不敏謝古人重踐言相值寧論價君其勿堅壁
致我長避舍

附次韻

王原祁

龍山查先生峭壁青松架讀書百鍾鍊等身與古化
清健更瑰竒韓蘇之流亞興來爛熳題珠玉續紛灑
余聞心折久畏友敢並駕霧豹窺半斑騷壇戰而霸
欲爲訪戴遊一官苦無暇坐令鄙吝生他山何所藉
小技試盤礴每耻居人下粉本追宋元筆墨四家借
腕弱媿癡肥定爲識者詫譬彼窺月魄餘光逗壁罅
慘澹心神疲甘苦方知怕開闔變化間微茫得失乍
始覺吾祖高至令人膾炙拙筆非許田奚爲拱壁假
眞宰雖難搜勉力爲君畫木仄配瓊瑤何以云報謝
荒率懼覆瓿賴公以長價紈扇懷袖中秋風奔上舍
次日麓臺爲余作巨然山水并次昨韻見訓再

叠韻奉謝

玳瑁裝書籤珊瑚供筆架我無二者樂宿習故難化新
詩出寒窘郊鳥或流亞一窺著作堂顏汗豈勝灑千金
享敝帚蹇足追高駕何異貧家兒蓬頭媿王霸方當苦
酬應供給日不暇先生地望懸乞者無憑藉十年率未
應惜墨肯輕下始知高人胸與俗少假借於余獨不靳
脫手洵竒詫用意取巨然危峯拆天罅趁人何窳兀旁
睨心膽怕細觀入秋毫恍若置身乍漁灣舟可檣樵徑
轂可炙勢成風雨晨不待休沐假猶嫌尺幅短更以詩
補畫人間有真境躡屐當追謝但恨多牛翁青山索高
價菟裘營已晚惆悵道旁舍

王服尹見和乞畫詩三叠前韵奉畬

米家書畫船秋蔭傍藤架爲君下一榻四壁烟雲化

尹服

時下榻麓
臺齋中

京洛少名園精廬乃其亞可無一斗墨興到

供揮灑君才况如江衮衮高浪駕偏師歷小敵勢欲戰
而霸篇終味深穩語妙神閒暇平生績學功授受有承
藉淵源大可溯派自震川下幸生君子鄉師友不外借
何當謬引重恐被識者詫昨日乞畫詩細聲風出罅蒲
牢懸我前欲扣吁可怕強顏托夙契結襪交非乍憶昔
隔牆居淋漓濡酒炙已已寓居上斜街與孫愷似
編修近隔一垣長從服尹飲六年
一醉夢歲月不我假青山憔悴容此景豈堪畫君歸約
髯孫吾亦偕小謝來詩及家德尹披圖賦招隱尚可長詩價忍

負好溪山挑燈向客舍

計開昭索題看菊圖

勸君莫種菊種菊須澆灌本自隔年培根從立夏判苗
新虞蠹蝕葉密防雨爛三時倘失勤那博一秋玩不如
走廟市取辦在一旦捧土上瓦盆妍媸誰復辨十年客
都邑萬事皆眼見披君看菊圖使我發長嘆

題曹涓符舍人畫扇

移得城南魚藻池便從紙上寫淪漪畫師正恐妨魚樂
不着飛來雙鷺鷥

費子葛陂屬題小影

費生客京華氣帶秋山爽學詩兼學畫離俗寄幽賞識

君塵埃中十載一俛仰羨君烟霞姿瀟洒不殊曩虎頭
爲寫照見者皆拊掌秋根走雜樹中有落葉響可無松
亭亭配汝玉朗朗勞生輪下坂歲月成鹵莽誰知靜坐
人一日可當兩

題趙天羽給諫小照

長身七尺紅兩顴成佛要在靈運先兩塵相隔一毫末
中被官事相糾纏豈知生來具慧業即現宰官爲說法
一林紫竹是禪機只在眼前誰見曉

送同門朱介垣掌科請假還吳

燈簾夜看秋菊花酒徒爛醉東西家竹垞去官君請急
近社花開少顏色明朝我亦作歸人二老猶堪結比隣

扁舟同訪籬邊屋及取霜前香稻熟

希文將南歸次淵明田居詩韵來索和章四首
故鄉去我遠縹緲三神山風塵一涉足忽忽傷徂年曹
生靜者流心若珠在淵不使閒草木萌芽荒寸田如何
瀟洒姿亦復趨人間一官比薪積後至爭居前坐看車
馬衢群情動如烟秋風夜入戶曉鏡增華顛身先候雁
翔心與浮雲閒歸期服勇決臨別翻欣然

老馬悔識塗亞身受羈鞅時因送人處一發田園想田
園近荒蕪計拙迷孤往家書昨日到久雨蓬蒿長八口
恒告飢憂來難自廣生涯事游惰獲報宜鹵莽

萬人浩如海酒伴日以稀曹生後我來今復先我歸家

人占喜鵲不寄秋來衣因之報歸信歲晚寧相違

讀書三十年如農守阡陌出門視蒼莽感覺靡所適君
看入貲郎朝發不待夕時來誇際會抵間快投隙得官
如驅羊舊給廝養役課奴力耘耔課婢勤紡績識時乃
豪俊章句工何益

敬業堂詩集卷十九

[Faint bleed-through text from the reverse side of the page]

敬業堂詩集卷二十目錄

遊梁集

將有中州之行七月七日姜西溟唐實君趙文饒

惠研谿楊端本宮友鹿項霜田錢亮功湯西厓

馮文子楊次也陳元之家聲山饑飲於陳六謙

邛舍席間酬別 出都晚宿賣店戲示許大

令霜巖 涿州過渡

上谷城南旅宿見可亭姪題壁

早過慶都 定州口號

新樂有感 晚渡滹沱

麥飯亭 鉅鹿道中

豫讓橋

邯鄲縣呂翁祠

邯鄲懷古三首

自杜店至磁州與霜巖並

馬行

渡漳河

曹捺疑塚

鄴中咏古四首

湯陰縣北村家

入大名界紀冰雹之異

滑縣

長垣道上戲示霜巖

從蘭陽渡黃河入大梁境

閱陳留縣志雜題十絕句補其所不載

桐城王方日爲亡友蔣度臣刻詩集於汴中後列

同學姓名余兄弟與焉度臣之歿宜有哀辭宿

草之哭亦情所不能已也二首

和霜巖縣齋秋雨八首

中秋喜晴

奪門行

汴梁雜詩八首

宋門別陳叔毅二首

陳留後圃習射示孫周人許蘭爲

朱仙鎮岳忠武祠

與王方日

汴中遇蔡遠士次韻留別三首

韓岡送同年張逸峰之安慶

重陽日接胡茨村觀察書及見寄二律次韻奉答

將歸故里留別霜巖三首

答趙蒙泉別後見寄之作

留別吳梅梁表兄

大風晚至杞縣訪李明府

不值

歸德道中二首

商丘周宜菴明府貽牡丹名種戲成四絕句

永城縣陳太丘祠

望碭山

南宿州即事

汴中無魚今日至固鎮盤

餐得此余方以為喜座有晉人乃至廢食云吾

土有客水鄉者所親必相戒勿食魚恐傷骨鯁

也南北嗜好之不同如此

臨淮曉渡飯於逆旅述老人所言

過鳳陽城外二首

池河驛

度磨盤山滁濠分界處

清流關

滁州

舟發六合

大霧自儀真曉至京口

關吏行

舟中紀事

雨中發嘗熟回望虞山

吳江田家行

敬業堂詩集卷二十目錄

終

敬業堂詩集卷二十

海寧 查慎行 悔餘

遊梁集

起乙亥七月
盡十二月

中州名勝之區也同學許霜巖謁選得陳留宰邀
余偕行涉滹沱循太行東麓歷趙衛梁宋之郊按
程計之古蹟不少資其車騎供我吟眺亦足以豪
矣

將有中州之行七月七日姜西溟唐實君趙文
饒惠研谿楊耑木宮友鹿項霜田錢亮功湯西
厓馮文子楊次也陳元之家聲山餞飲於陳六
謙邠舍席間酬別

屋簷秋網拂蠨蛸弦月如弓挂一鞘剪燭談深宜夕館
看花人散憶春郊窮無好句供傳寫老不中書代解嘲
實君見送詩有舍人官職是虛名之句來本無名歸亦得只愁飲餞累貧
交

出都晚宿賣店戲示許大令霜巖

又是南程發軔初我今戴笠爾乘車衝泥早歇林間馬
積潦秋生戶外魚十度棘闈憐報罷一官花縣喜新除
屠龍妙手牛刀割餘技猶堪理簿書

涿州過渡

胡良河蔭青葱柳督亢陂連宛轉城但覺林中無暑氣
不知風外有蟬聲喚迴塵夢秋初到誤隨吟鞭馬一驚

自笑年來詩境熟每從熟處欲求生

上谷城南旅宿見可亭姪題壁

客路逢連雨秋原洗鬱蒸人投曾宿店鼠瞰未吹燈一
榻夜涼入二更殘月升忽看題壁在為爾掃秋蠅

早過慶都

棗林槐埂翠模糊十里烟光接慶都堯母陵荒秋草徧
戴嵩新畫牧牛圖

定州口號

劃花小盃愛初燒秘色傳來閱四朝莫打磁甃輕試玉
人間方貴定州窰

新樂有感

客路匆匆過定州鮮虞臺下小遲留輿圖西漢中山國
恩澤先朝外戚侯支棗詩成歌樂土種瓜人去感新疇
眼前風物全非昔細草鳴駝一段秋

晚渡滹沱

涼風蕭蕭響白荻老鶴啣魚作人立小船爭渡晚尤喧
濁浪兼泥秋更急中流仰看團團天太行突兀當我前
未知馬首向何處千里夕陽橫紫烟

麥飯亭

蒼皇那免嘆途窮大業幾隳小衄中名號未尊誰是賊
英雄有識獨從公兩河子弟收星散一飯君臣見始終
值得將軍依大樹不勞上殿更爭功

鉅鹿道中

要害畿南在必爭時危往往屢稱兵居人不重侯芭里
過客猶尋石勒城雲挾常山蛇尾動地連汾晉犬牙成
如今不用論形勝稔黍秋郊一望平

豫讓橋

首四句姜西溟舊作也
辭意未盡爲足成之

趙入宮臣廁中趙乘馬臣橋下區區欲報國士知可憐
一死何能爲君不見博浪一椎雖不中置身事外非無
用

邯鄲縣呂翁祠

幻妄浮生豈有涯何妨鼠穴駕牛車貧兒好作音遊仙
夢怪事偏傳小說家事出虞初志古道蹇驢多北向空庭秋

日又西斜人間官賤黃金貴乞與燒成九轉砂

邯鄲懷古二首

口舌相如位上卿從教趙括喜談兵璧歸間道雖難奪
師出長平已被坑唇齒連衡如有約虎狼縱暴本無名
淒涼蔓草荒烟地民命無如戰國輕

美人一笑元無罪不殺難邀好士名趙勝何曾識毛遂
信陵差解重侯羸符來袖裏圍方解錐脫囊中事竟成
碌碌因人嗤若輩也如跛客強隨行

北道何期得鄧晨信都南望尚迷津群情正是思劉日
假號先歸賣卜人計定一軍終拔趙怨深三戶必亡秦
不妨整作逡巡避龍準諸孫自有真

自杜店至磁州與霜巖並馬行

一天風露野田秋曉路熹微辨馬頭槐柳陰中辭杜店
芰荷香裏到磁州鷄鳴巷陌烟初起鷺立陂塘水慢流
過此頓忘身是客與君題壁紀清遊

渡漳河

夜聽邯鄲趙女歌起乘殘醉渡漳河天垂曠野名都壯
路入中原戰壘多細雨一蟬高岸柳西風匹馬故宮禾
灰飛瓦解尋常事誰管繁華委逝波

曹搯疑塚

分香賣履獨傷神歌吹聲中總帳陳到底不知埋骨地
却教臺上望何人

鄴中咏古四首

洹水清流見麗譙鄴中氣象太蕭條詞華不過誇三國
人物誰能算北朝冰井臺荒秋瑟瑟香姜閣廢雨飄飄

齊磚魏瓦人爭托想見當年土木妖

魏銅雀瓦色青內平印工人姓名皆

八分書以為硯貯水數日不滲齊起鄴南城磚瓦皆以胡桃油油之當油處有細紋曰琴紋有白花曰錫花古磚大者方四尺上有盤花鳥獸紋千秋萬歲字其紀年非天保則興和又有磚筒承簷溜者花紋年號皆同內圓外方亦可為硯按王荆公詩云陶甄往往成今手尚托虛名動後人則真品在宋時已不可得

自從僭竊起當塗虎視中原氣總粗大抵奸雄皆好亂
居然割據亦稱都車中不少彈箏客案上頻繙聚米圖

十二渠成流澤遠至今土壤號膏腴

林慮平聲山色尚蒼蒼太尉登朝事可傷豈有公孤能翊

漢早知廢立總由梁勢成刻兔驕三輔禍始金蛇恨永

昌慚媿上書收葬吏猶傳郭亮配楊匡

錦衣別築相州堂使節移來自武康公獨勤勞兼將相
誰能事業更文章威名要取雄殊域宦跡何嫌避故鄉
碑版兩朝尊顧命豈徒一記重歐陽

湯陰縣北村家

烟際露茅茨田家正午炊韭花秋逞味棗實晚垂枝放
犢青蕪岸漚麻綠水池地偏稀客過籬落有人窺

入大名界紀水電之異

朝行渡黎陽四望如絕徼又如入霜野慘澹初經燒古
墓多白楊連根拔當道棗黎盡僵仆隨實滿泥淖村中

禾黍空天半鳥鴛叫客心慘不樂經眼非意料道逢白
髮人下馬亟慰勞為言前七日陰氣變晴昊疾風西北
來電雷乃前導須臾大雨雹奮擊恣凌暴為拳為芋魁
所向等飛礮居民屋瓦裂填塞及井竈行者不及防人
傷馬傾倒濬南滑之北廿里陷冰窖草木生其中焦原
同一燎含悽問隣舍旁有豐年稻邑長豈不知逡巡莫
以告我為田父語天變非人造不聞平陽城一震跡如
掃殭尸十萬戶蔽野復誰弔朝廷憫災傷大下乞言詔
公卿滿臺閣相視無寸效被禍爾猶輕區區胡足較

滑縣

停鞭小立聽潺湲魏滑分河在此間自洛以東百水皆會於此唐沈亞之

有魏滑分河錄樹杪帆檣瓠子渡城西風雨大任山野無秋草
年仍歉地近朝歌俗尚頑誰與牛羊典芻牧未應蒿目
委時艱

長垣道上戲示霜巖

前行忽引朱衣吏夾道爭看擁似蜂却咲相如緣底事
也隨車騎走臨印

從蘭陽渡黃河入大梁境

馬頭半月看烟鬟行過燕關漸軋關今日中流回首望
黃河截斷太行山

閱陳留縣志雜題十絕句補其所不載

幡然臺外野雲黃畝畝餘風重此鄉不解後人偏好誕

每從田叟問空桑

伊尹生空桑語
出呂氏春秋

漢祖初來厭監儒監門長揖互挪揄入關全賴教倉粟

計出高陽一酒徒

酈食其陳留高陽人今
縣有高陽堡即其故里

割肉恢諧父老旁千秋銘記有中郎羨他社宰封侯地

不改當初戶牖鄉

蔡邕索昏庫上里社銘云惟斯庫里
古陽武戶牖鄉陳平由此社宰佐高

帝定天下按史平
初封戶牖侯故云

殺雞自作高堂饌草具何妨對客供一飯成名真有幸

天教季偉遇林宗

伯喈本意欲東奔失計何人與訟冤畢竟殺身緣一嘆

九原應悔出私門

分茅幾姓列王侯古郡相傳屬此州若以報施論漢魏

後先亡國兩陳留

漢獻帝從陳留王入承大統
曹奐為司馬所廢封陳留王

假道穿渠到小黃

五代通錄李珣曰河南有外黃下黃
漢書地理志陳留有外黃小黃縣五

代史改小黃
為下黃訛矣

赤松祠下月茫茫鎬池遺壁今還壁氣盡

人間十二郎

事見大業
開河記

北狩蒼黃宋兩君徵兵諸路咲紛紛平時誰畫元豐策

輕汰畿東捧日軍

宋都汴陳留為畿輔要地舊設天武
捧日等軍元豐中有詔裁減故靖康

之禍近
無聲援

養士恩深三百年倒戈迎賊怪爭先殘黎及記滄桑錄

死事人稀一尉傳

崇禎辛巳十二月賊由襄鄧北來汴
南州縣望風迎降陳留署令某庸才

也不知所措典史邵大濟秦中人
竭力拒守城陷不屈全家投井死

濁浪高於師曠城

見陳留風俗傳人隨廬舍盡東傾至今雨濕

天陰候過客猶聞鬼哭聲

崇禎壬午決朱家寨水入大梁浸淫及於陳留城內外水

深丈餘屋宇盡沒邑無居人

桐城王方日為亡友蔣度臣刻詩集於汴中後

列同學姓名余兄弟與焉度臣之歿宜有哀辭

宿草之哭亦情所不能已也二首

不是無家柰別離蓋棺事了始歸期半生好客皆情累

一第成名亦數奇篋底有金貧官惜人間無路老方知

最憐湖海元龍氣收拾光芒入小詩

迴思腹痛平生語謬托知音撫絕絃長恐雲烟隨散滅

忽驚珠玉已流傳九原可作應相慰同調無多又自憐

不覺餘哀生感激為君展卷一潸然

和霜巖縣齋秋雨八首

陳留井邑荒風俗尚淳古官舍雜民居蕭蕭一環堵移

牀避屋漏正值秋來雨秋雨有時晴茅茨亦易補乘時

無鉅細百廢在一舉

許子天下才卑棲屈茲土到官已十日坐看魚生釜雖

稀傳事柳尚打排衙鼓我來况無事小住因賢主只合

向空齋攤書聽涼雨

昨日牒文來歡聲滿城郭黃河一丈減秋水漸歸壑回

頭梁宋郊禾黍正可穫豈有溝澮盈決防助流惡野人

殊過計倚杖候乾鵲

荒庭無竹樹草上墻頭生誰知一穴穿已帶秋蟲聲老

夫方隱几鼻息如雷鳴雨點忽到窓颯然歸夢驚此中
有佳句夢斷詩未成

我友趙十郎索居廩延城趙子晦時宰延津去此二百餘里河孺一小

邑長吏管送迎我思往相就所畏泥中行乃知行路難

中有躑躅情

殘暑去後巡蠅聲猶未歇蒼蠅何足云壁有鈎尾蠹孤

燈明復暗被螫或倉卒土產多毒人吁嗟慎膚髮陳留產全

云

河流去城遠掘井不破塊常時瓢飲難汲自十里外官

庖惜民力水厄亦有戒天漿忽傾盆餘澤走滂沛瓶罌

既滿貯茶味即沆瀣絕勝調水符勞心防狡獪

木榻乘秋陰微蒸入布被解衣背粘席轉輾出奇計熱

葦著瓦盆濛濛透霧氣苦遭烟炙眼聊免體被漬身居

燥濕間那得兩遂意

中秋喜晴

連晨苦雨悵淹留地近梁園客勸游夢裏無花誰勸酒

天邊得月且登樓城圍老柳吹笳夕露灑寒蟬擊櫝秋

却記去年今夜會滿堂憶去年風晨堂之集醉湖州

夸門行

秦師圍困邯鄲城趙人乞援如乞盟信陵重以姻婭故

坐視不救非人情三千私客赴急難致死一戰猶堪爭

今者無端傾國出不以君命俄專征宮中符竊嬖倖手

聞外力奪將軍兵鐵椎碎首彼何罪汝自微幸貪功成
誰為此策大紕繆公子幾陷無君名生平下士頗折節
慚媿虛左親相迎私恩不負負大義二者較量孰重輕
先王正道日陵替術士詭計方縱橫不聞死事憫晉鄙
但見好客誇侯嬴史遷本意喜任俠公論久掩吾不平
千秋事往一感歎弔古聊作夸門行

汴梁雜詩八首

土岡起伏向平蕪蕎麥花開侶雪鋪舊日樓臺埋井底
秋來風雨暗城隅枚作客虛詞筆高李論文剩酒壚
少陵與李供奉高常侍同時客遊梁宋間故其昔遊詩
有往與高李輩論交入酒壚之句今城東南有三賢祠
莫怪遊梁無一事已將名姓混屠沽

鞏洛東來地勢窪一條清汴走長蛇霸圖難畫鴻溝界
恨事空椎博浪沙博浪城在府北衰草平原秋放牧西風古堞
暮棲鴉靈光一寺巍然在大相國寺路地最高壬午之
禍獨不為沙土所埋汴中樓閣存者惟此而已留取伽藍記夢華

削除七國獨存梁愛弟終因母后妨禁網初寬到賓客
人才一變起詞章平臺築後門常闢東苑成來志稍荒
但取虛懷能下士豪華原不累賢王

梁朱趙遺墟指汴京紛紛代禪事何輕也知光義難
為弟不及朱三尚有兄將帥權傾皆易姓英雄時至適
成名千秋疑案陳橋驛一着黃袍遂罷兵
歲幣輸來不計緡無端齒冷為亡唇偷生虎穴甘南渡

忍死牛車痛北巡翻覆兩家天假手興衰一劫局更新
幽蘭堂畔誰相惜只有從亡十九人

勝國分藩本屬周承平樂事數焚樓星連北極雄繁會
地是中原沃衍州樂府新聲翻百闕書堂名蹟勒雙鈎
最憐禍較江陵烈河伯摧殘甚鬱攸

蠹穴將穿積勢成洪流直灌大梁城運移天險翻資盜

禍起庸夫好論兵

明季流賊圍汴推官黃澍倡議決朱家寨水以灌賊營賊覺而遠避開封

翻成巨浸矣

不信龍蛇皆沴氣可憐魚鱉盡蒼生滄桑變後

秦灰黑誰見黃河十里清

新標禹廟鎮河濱師曠臺邊迹已陳

吹臺今更名禹王臺獨向蒼

茫時極目誰當搖落不傷神空倉雀鼠千村賦故壘牛

羊四戰塵老傍人間多閱歷漸無閒淚可沾巾

宋門別陳叔毅二首

同作大梁客情因去住殊

時叔毅舉家客汴城

累君為地主餞我

赴歸途對酒狂猶昔謀身老漸迂未妨吟思苦頷下賴

多鬚

全家猶旅食別路阻清遊

相約同登吹臺為兩阻

近約尚難必歸

期可自由貯愁聽舊事挈涕洒神州

令伯元倩先生崇禎末為開封司理

莫作長流落風塵易白頭

陳留後圃習射示孫周人許蘭為

縣齋秋日長兀坐愁面壁異書如荊州欲借那易得後
園有棄地糞壤經馬櫪泓然見清池老眼喜一條初看

剪蓬艾次第拾瓦礫朝來箭道成百步盡所歷兩生頗
好事飯罷走相覓邀我日同來分朋控鳴鏑雖無皮畫
鶴縛草聊代的引滿試射之於中寓考績浮情或倖中
詭遇本無適古人一技精往往互砥激勿徒視遊戲儼
若對強敵我昔方盛年從軍曾草檄風前餓鴉叫頭上
飛霹靂蹉跎萬念垂漸怕矛頭漸力衰安可強眾醜供
指摘自咲諒無成習勞猶運甃子今心膽壯作此太寂
寂斯言可類推凡百慎剖析

朱仙鎮岳忠武祠

平生感憤興亡際往往無端供裂眦晉之懷愍宋徽欽
失國偷生本同類兩家子弟又庸下南渡誰論復仇義

千秋乃有岳將軍欲雪斯慚出奮髀曾經讀史浮大白
况到提戈用武地一條衣帶拍黃河倒捲狂瀾作餘勢
當時大業已垂成談咲收京俄頃事乞和語出金人口
二帝歸如反掌易南內何妨奉上皇中原未必虛神器
可憐計算不出此奸相逢君有深意朝廷不要兩宮還
那許疆場壞和議乾坤震蕩功百戰性命風波獄三字
湯陰故里虎林墳幾處經過頻洒淚豈如此地更悲涼
血裹征袍等閒棄二百年來崇廟貌祠創于成化戊戌兩行檜
栢干霄翠北風怒吼白日昏猶有英雄不平氣

與王方日

姚生寓舍晨排闥一咲驚君起著衣

余初識君於同半年姚別峯寓中

荀善言詩集卷三十一
面相逢雖草草兩心經別自依依倦游客况秋風冷末
路交情酒伴稀不料尚邀公子顧累他紅粉避燈輝方
夜過余寓適有女郎在座聞公子至避匿不出故戲及之

汴中遇蔡遠士次韻留別三首

與君少小生同里嬾蔡知名二十年今日汴中初識面
鬢絲秋老菊花天

買蟹宵來倒客囊

汴城無水味蟹尤難致一枚例索錢五十文

一燈相對話

蒼涼舊京風物吾猶記宋嫂魚羹薛嫂羊

馬嘶門巷客將還殘醉扶頭改別顏多感故人相送意

略煩秦女唱陽關

時有秦姬在座

韓岡送同年張逸峰之安慶

去年下第傷坎坷君館髯姜西濱兼客我順風三日不張

帆綠水名園停畫舸一攀楊柳辭春陌兩見榆槐更歲

火那知此地忽相逢客裏班荆當道左大梁城東秋野

濶片片飛鴻向空隨夜騎驕馬到韓岡我倚身強君亦

頗人間裙屐胡足道絲吐春蠶自纏裹天津公子氣雄

豪長劔短衣無不可近聞西陲方有事廟算行將啟邊

鎖時閱邸抄聞出師之報

吾曹猥以不羈身五寸垂綏等遊惰君

依官舍獲侍奉

時逸峰隨尊甫觀察公赴任安徽

我赴歸期尚難果殘

樽相屬且勿辭黃花正綻霜前朶

重陽日接胡茨村觀察書及見寄二律次韻奉

答

含語相逢兩未申，匆匆悔作渡河人。敢期交臂心相許，
及捧來書意果真。白雪愛吟千遍熟，黃花催換一番新。
眼前事事俱難料，不爲傷秋歎亦頻。

一序何當重左思，重煩傳語到臨岐。

來書屬余作詩文序故云

可知

投劾休官地未是，移床遠客時九日歸心憐我急。十年
恨事識君遲，不嫌寂莫遊梁跡。點綴行裝賴好詩。

將歸故里留別霜巖三首

百里衝煩邑，河流接小黃。鄉程貪漸近，官味看初嘗。
家本傳儒術，名猶在舉場。此情吾諒汝，捧檄爲高堂。
別後寬相憶，君才百事能。神明真不忝，蘊藉若無憑。
世苦需經濟，官廉慎愛憎。似聞田父語，蓄眼見何曾。

四海皆兄弟，相關得幾人。不愁官俸薄，翻計客囊貧。
却饋非吾矯，論交到爾真。平生知己意，感動豈無神。

答趙蒙泉別後見寄之作

趙壹豈窮人，文章天下冠。成名陷羅網，識字召憂患。
平生師友間，慷慨赴急難。一機駭初發，二事將并案。
隻手探涕羹，孱軀分糜爛。欲知氣難奪，正賴神不亂。
戴盆却望天，畫地詎宜狎。泊乎寃得白，重以讒被間。
幸免輸鬼薪，誰堪讀城旦。先生鮮穉怒，一咲春冰泮。
脫身楷拳中，去國等流竄。疲驢入京洛，旅食年頻換。
囊中綠綺琴，焦尾實經爨。知音世不乏，聽者每三歎。
捷徑有爭先，陳人尚魚貫。空持魯褒論，孰下干木判。
遇我夙懷傾，招呼詩

酒伴貧交無強合，失意多聚散。老淚落河橋，離愁渺雲漢。殘秋滯梁宋，仰視南飛鴈。寄我別來詩，開函一腸斷。君心人盡諒，蹤跡聊羈絆。出語忌孤高，時情伺譏訕。

留別吳梅梁表兄

幾日重陽雨，雨晴天忽寒。北風醒別酒，落葉打征鞍。不計授衣晚，欲爲分袂難。他鄉老兄弟，情到勸加餐。

大風晚至杞縣訪李明府不值

沙土晚濛濛，孤城萬木中。氣吞平野日，聲壯渡河風。結伴隨陽鳥，離程極轉蓬。不須煩地主，旅食報年豐。

歸德道中二首

海鴈橋邊路，向東霜消日。氣午怡融，木棉吐子如脂白。

野柿垂條似火紅，驢背人簪雙髻菊。牛蹄塵漲四輪風，旗亭一醉誰同伴。獨把吟鞭過宋中。

寒烟衰草入疎蕪，雖水流同戰血枯。他日江淮論保障，至今祠廟具規模。城連耗土秋多鼠，樹倚神叢社少狐。惆悵繁臺歌管歇，角聲吹落孝王都。

商丘周宜菴明府貽牡丹名種戲成四絕句

戚里名園結構新，千株遠致洛中春。

燕中苑圃爭購此花，今秋北去者以

商丘一縣計之已至一千本

多情誰似河陽宰，留取名花贈野人。

珍重新寒九月初，歸程作伴太憐渠。渡江船上人爭看，桃葉桃根恐不如。

瓦礫堆墻老圃家，燒餘一片變桑麻。問余臺榭今何處，

也要移栽富貴花
包裹泥封護本根
隔年分種自梁園
得歸且作看花想
未必花時穩閉門

永城縣陳太丘祠

賢人處末流
德器務廣大
先生得此意
名不黨籍挂庸
夫取同塵
君子重遠害
偶然出從政
初不計毀最
曾爲茲邑長
治道去其太
豈必赫赫名
當前互驚恠
到今有餘慕
俎豆禮無殺
我來謁公祠
下馬肅瞻拜
題詩警俗吏
似爲求名戒
不見道旁碑
去官碑輒壞

望碭山

萬乘東南巡
本厭天子氣
匹夫迺心動
走向此中避
雲氣隨真龍
人誰跡劉季
可憐秦皇愚
不及呂后智
英雄論成敗
孰者意料事
秋色中原來
蒼然入淮泗
蜿蜒忽橫亘
一束千里勢
豐沛袒右肩
濠梁舒左臂
古來雜王霸
要豈山所致
吾將訴真宰
鏟爾作平地
山色如死灰
嗚呼識天意

南宿州即事

符離城外騎驢女
愛着紅裙愛插花
十里迴車無避處
不辭相送到村家

汴中無魚
今日至固鎮
盤餐得此
余方以爲喜
座有晉人
乃至廢食
云吾土有
客水鄉者
所親必相戒
勿食魚
恐傷骨鯁也
南北嗜好之不同

如此

各有鄉風兩不知區區口腹莫相疑看他葱薤堆盤處
是我攢肴廢箸時

臨淮曉渡飯於逆旅述老人所言

人影動浮橋清流繞淮甸月光水面澹初日烟中見中
都地脈連風物南方變城灣鵝鴨鬧客飯魚鱉便逆旅
八十翁自云本武弁前朝守陵戶賦役除本縣自從喪
亂來瓦落奉先殿天家王氣盡凍餓甘喪賤誓死不去
鄉依依豈他戀曾供洒掃職麥飯每私薦孟冬時享近
又欲往營奠言罷竟出門回頭淚如霰

過鳳陽城外二首

帳下居然識帝王千秋閭墓表滁陽時來將相皆同里
淚落英雄有故鄉芒碭天青雲氣散江淮月白水聲涼
龍蛇變滅須臾事猶指山名號鳳皇

元老還朝起廢臣

宜興再相起馬士
英為鳳陽總督

二陵收氣避黃巾

忽聞淮泗聲援地已奉邯鄲假號人南渡半年輸弱晉
西來群盜甚符秦青絲白馬他年恨草木餘威在壽春

池河驛

古驛通橋水一灣數家烟火出榛菅人過濠上初逢雁
地近滁州飽看山小店青帘疎雨後遙村紅樹夕陽間
跨鞍便作匆匆去誰信孤蹤是倦還

度磨盤山滁濠分界處

只在羊腸鳥道間不知行過兩州山千家大柳烟中驛
一綫清流井底關樵斧樹稀行客倦茅亭茶熟老僧閒
路難馬力尤須惜莫遣鞭多比石頑

清流關

低迷野氣中路斷遇崖嶮陡然拔千丈直上匪由漸行
子中州來巖關此為險其西道尤惡石滑破馬膽步行
到關門一往生勇敢長風捲林薄敗葉撒兩點豁達眼
界開晶熒日光閃少休得古寺徐使神氣斂想當割據
初外戶晝長揜寧知暉鳳擒猿鳥就籠檻邇來幾易代
地僻設防減僧房同啟閉鎖鑰誰復檢經過亦偶然形
勝窮一覽

滁州

岡迴樹轉到城遙甃石纔通路一條細水流應落西澗
韋左司有滁
州西澗詩好山青不盡南譙名賢出守曾相繼異姓
封王又一朝爭說此邦風土好至今生計穩漁樵

舟發六合

馬煩車殆歷間關轉愛江程一日閒吳女布帆十二幅
畫船頭尾載花還

大霧自儀真曉至京口

斗柄插秋江夜行拍西東五更乍迷道水氣昏霾霧小
舟一葦如漂蕩雲海中焉能辨咫尺所向疑皆窮何物
導我前群飛賴南鴻稍知京口近忽報金山鐘旭日出

未高半天已先紅須臾掃無跡一望東南空但見旗脚
舒平流起微風畏途付噩夢回首猶忡忡

關吏行

大農按籍加關稅小吏機乘搜瑣細吳中支港夜不行
水柵村橋晨尚閉歸人癡絕良可歎枯蒲帶土包牡丹
壓馱馱增驟價貴入船船重關津難有情對爾應惆悵
近日花綱多北上獨携此本到江南莫怪挪撇兩相向

舟中紀事

十月之交冬令行雷宜收聲乃發聲嬰兒晝啼天女咲
群蟄故戶魚龍驚初聞吳中夏大水萬頃平疇長蒲葦
又聞蔚州七月霜盡殺稷菽秋無糧雖云地氣異南北
何至天道違陰陽野人未敢窺天意目擊口傳非一事
他年誰考五行書五行志災不志瑞

雨中發嘗熟回望虞山

錢生

玉友

約看吾谷楓輕裝短櫂來匆匆夕陽城西嵐氣

紫正值萬樹交青紅天工似嫌秋太濃變態一洗歸空
蒙湖波蒸雲作朝雨用意不在丹黃中大痴歿後無傳
派此段溪山復誰畫老夫新句亦平平要與詩家除粉
繪

吳江田家行

高田去水一尺許低田下濕流沮如半扉潦退尚留痕
兩足泥深難覓路土墻頽塌茅屋倒時見牽船岸上住

聖和學園藏
敬業堂詩集卷二十
六
家家網得太湖魚米少魚多無換處朝廷聞下寬大詔
今歲江南免田賦野老猶供計畝租官倉自貸輸糧戶
田家田家爾最苦有鐵何煩鑄農具半生衣食在江湖
賣犢揚帆從此去

敬業堂詩集卷二十

敬業堂詩集卷二十一目錄

皖上集

題三娘子圖四首

并序

雨後行園梅花已落力輩

方編籬

食薑心菜

南湖舟次遇魏禹平時禹平歸自濟南余將往皖

上二首

順風無帆戲作短歌

董文敏臨米天馬賦卷子真蹟余弟德尹以十二
金購自賣骨董某家鑿微上人貽書張介老謂
爲遠客攫去足值五十金介老作長歌紀其語
至呼弟爲惡客且云此公詩歌妙絕特削其名
氏正欲寄元激之使戰語托滑稽其實乃深忌

之也時德尹已北去戲次原韻即做峴老體并

示鑒公 去秋自河南歸携植牡丹

數種春來適有安慶之役不及待其開以詩紀

別 塘西舟中喜晴得六言律

詩一首 過峴老與之論詩

飲周柯雲家玉蘭花下

寒食湖上作二首 題蔡藜揮舫齋次峴老韻

從湖州至四安舟中大雨

雨中過九里岡 廣德州

連日風雨山行頗有寒色

飲十字坡茶菴 紅林橋

宣城道中喜晴

曉望敬亭山懷梅耦長孝

廉 高嶺菴小憩

渡清弋江

飲劉蘧菴光祿慕園二首

南陵早發

山家柴柵編竹而不築墻

云以拒虎虎能踰墻而不敢窺籬蓋疑其為陷

穿也作虎落歌 蕎麥灣大雨

山店阻雨次徐任可韻 行經九華山麓欲登不果

任可有詩戲次其韻

碎石嶺詞

初至皖城喜遇同年姚別

峰兼招程松皋舍人

程松皋得余所寄詩即夕自桐城命駕過皖次東

坡喜劉景文至韻 懷寧劉東臯明府招飲薔

薇花下 三月二十九日賦餅花

晚晴登安慶城樓 同年左子畏家上臣各有

魚米之餉詩以報謝

與子畏上臣飲楊令詒孝廉宅

寓窗書所見 僧房多鼠戲次青丘集中

乞猫詩韵 皖城遇張損持庶常

答婁東曾蘭坡次唐實君考功扇頭舊韻

任可將歸有詩留別次韻奉送三首

損持見和前篇再疊韻奉酬

同損持任可步入一柏巖

酬詩僧愷月

詩筒為損持賦

周通守劉明府惠鮓魚感賦

登迎江寺塔同程佐衡作

次韻會劉東臯 三疊前韻答程佐衡

弔元左丞余忠宣公墓二首

佐衡置酒大觀亭招同損持蘭坡志鄴分韻得嵐

字

宿松朱字綠博學嗜古所

葺南岳考三卷援據往籍至數萬言而斷以已

意大要謂古之南岳乃瀟之天柱峰非楚南衡

山也頃於皖城官舍出此見示索余題辭作歌

贈之

敬業堂詩集卷二十一目錄終

敬業堂詩集卷二十一

海寧 查慎行 悔餘

皖上集

起丙子正月盡四月

去冬歸自汴梁今年擬息勞筋稍理舊業適承座
主清溪公之命與令孫任可偕往皖城避春江風
浪之險由四安鎮取山路經宣城池陽抵黃盆口
始渡江皆向來遊蹟所未到也

題三娘子圖四首

并叙

按諸葛元聲兩朝平攘錄三娘子俺答長女也生而
清麗資性穎異善書番文尊中國尚瞿曇每於佛前
懺悔求再生當居中華已受襖兒都司聘俺答通焉

遂奪之隆慶五年俺答歸順封順義王三娘子封忠
順夫人萬曆壬子俺答死其舅黃台吉烝而配之黃
台吉納婦一百八人以象數珠三娘子佐之貢市惟
謹台吉死長子扯力艮襲封復烝而配之丁亥六月
扯力艮同妻入邊巡撫鄭洛傳語三娘子無忘香火
舊情卒聽平受賞于弘賜堡去大同六十里十七年間三封
貴爵貢市之不渝多有力焉獨石中軍素善繪因密
圖三娘子及受封三王像以獻於朝故得其詳如此
馬子衍齋屬周兼畫此圖索余題句略撮始末使覽
者有考焉

香燈小炷懺前因一念三生誤隔塵莫聽琵琶思入塞

明妃曾是漢宮人

別移部帳事休屠衆裏方知顧盼殊百八摩尼齊合掌
讓他一顆佛頭珠

詔恩三換等兒嬉報貢頻頒五色絲見說兩朝曾款塞
不知通好是關氏

埋香青冢亦堪悲粉黛流傳又一時想像承平光景好
風流邊將畫蛾眉

雨後行園梅花已落力輩方編籬

宿雨潤苔痕幽人杖藜至池邊一株雪狼籍香滿地不
忍踏成泥猶存惜花意平生無長物外遇中鮮滯一出
動經年窺園偶然事敢為花作主吾老身如寄乃復補

蘇詩言集卷二十一
樊籬遮防亦情累小童如我嬾長養薔薇刺欲剪又踟躕何當絕非類

食臺心菜

用心霜雪餘尺寸取易長土膏發春雨其葉沃以光漸見碧玉蓂枝枝葉中央初來但小摘爛熳抽四旁花時籬落間色比黃金黃而我乃爲口斲歸滿筠筐芼之供盤餐指動齒頰香貧家寡私奉婢僕皆品嘗可無勤惰分於此示激揚園丁給宜厚特以七箸償山田歲不登老圃聊救荒所慚勞汝力充我藜苆腸

南湖舟次遇魏禹平時禹平歸自濟南余將往

皖上二首

低田幾稜菜花雨野水一灣蘋葉風却向家鄉話京國小桃猶是別時紅

烟雨迷濛港脉斜葑湖水落吐圓沙春波門外春帆影君是還家我別家

順風無帆戲作短歌

風頭滾滾浪花白啣尾隣船開絡繹千檣多作挂帆行弦曠虛弓箭初釋開翎一一雁投渚騁足群群駒過隙同時離岸我獨遲我坐無帆聊挂席偶然利鈍各有數相去寧須論什伯來舩未必盡無帆咲爾有帆風又逆董文敏臨米天馬賦卷子真蹟余弟德尹以十二金購自賣骨董其家鑒徵上人貽書張介老

謂為遠客攫去足值五十金峴老作長歌紀其
語至呼弟為惡客且云此公詩歌妙絕特削其
名氏正欲寄元激之使戰語托滑稽其實乃深
忌之也時德尹已北去戲次原韻即傲峴老體
并示鹽公

古來善書者稱聖亦稱顛張芝米芾相繼出遂覺格勢
大變非從前華亭老宗伯落筆何翩翩衆中自集一家
法學本人力姿由天偶然放手撫寫天馬賦一斑窺豹
知其全人間流落有此本幾逐市販同推遷昨來忽入
好事眼三百十字顆顆明珠圓傾囊倒篋可嘆不自量
巧取或怵他人先腰纏十金一揮隨手盡世上乃有此

種揚州仙還家但徒步不辦書畫船老僧旁觀歎且妬
謂此可值五十千大為得者長聲價暉卷十倍增鮮妍
語聞張子恍然失固是痴癖寧非賢君家向來收藏亦
已夥細入針孔思貫穿得無羨魚人往往猶臨淵去年
臥病九十日料理藥物供高眠頗聞典賣及古玩何異
開閣散遣諸婬娟故人傳與衛生訣撥棄嗜好年方延
性之所近終不化如噉石蜜甘中邊又如雅量整止酒
麴車相遇口角仍流涎作詩相惱覲一擲寸鐵不用張
空卷豈知懷寶出間道捲旗臥鼓有似刀藏鉛無端索
和乃到我野戰突上荒山巔謂我曾經閱此卷劇壘相
向師非偏我能為汝咸其輔頰舌使汝鉢腎刻肺飲食

夢寐中難捐書評髣髴舉大概虎跳鳳翥龍蜿蜒若將
墨寶比良劔也應光恠直射文星躔然而達人宜自廣
美玉豈必收于闔貪多務得物斯聚富而可求吾亦為
執鞭近來書畫大半入秘府居竒幾輩包裹充夤緣三
間茆屋配汝作清供書生習氣如此真可憐猶復噉噉
引喙較得失物情什伯千萬胡相懸我於妙墨豈不好
只坐欲買羞澁囊無錢金奩玉軸所見不為儉過眼瞥
爾心恬然必教一一皆已有天地何以生雲烟况聞佛
法無我相試拈此句詰老禪滑稽代作解嘲語滿紙倔
強定有瀾翻篇輸攻倘許破堅壁正恐筆削為無權嚴
詩他日編杜集能禁此客姓氏泯泯終無傳

去秋自河南歸携植牡丹數種春來適有安慶
之役不及待其開以詩紀別

客遊出梁宋地主頗不俗貽我六娉婷相隨到空谷我
貧寄茆茨貯爾無金屋繁華有借境直以名姬蓄殷勤
手親栽不忍委僮僕冬暖少雪霜春陰滋霹靂栽培本
天意私願苦難足可惜姚家黃一株萎偏獨五家尚成
隊紉綺可合族別之豈無情行期為改卜未償道路債
妄異看花福開時果出門詩識已早伏余去年詩有未
必花時穩閉門
之明年豈不好吾老狀可掬應咲歸來遲尋春同杜牧

塘西舟中喜晴得六言律詩一首

雨絲渺渺將斷日氣葱葱半銜客路漸逢寒食遊人未

聖和學圃類編卷之二
詩言集卷之二
五
換春衫桃花古渡茆店柳色輕烟布帆此去清溪不遠
數尖已露晴巖

過峽老與之論詩

昨日鳩喚雨今朝鵲報晴村村桃李花處處隨浮萍中
流幾千點著此孤舟輕故人知我來一咲門前迎別來
四十日頗覺太瘦生苦吟誠乃疲中有金石聲子詩人
所怪任意方孤行自喜正在茲焉能博時名引我附同
調背汗顏亦頽失學事情游東西無期程古人傳著述
多在名山成涉獵得其粗不如閉戶精子今雖善病幽
居領餘清物理與天機靜觀皆性情願子堅自信後來
有公評

飲周柯雲家玉蘭花下

小船撐入菰蔣牙主人如客偶在家入門一揖仰面咲
玉樹正吐墻頭花此花畏雨兼畏日難得春來好天色
今朝恰是養花天又被狂風恣狼籍興來相就席乍移
無酒酤我我不辭杯中自吸冰雪影紙上誰賞瓊瑤詞
白雲茫茫屋上下醉眼迷離兩相射鈎簾何用更燒燈
自有花光能照夜

寒食湖上作二首

紅粧催上木蘭舟女伴家家愛出遊多事六橋新柳色
自含烟雨自遮樓
葑田青合去年沙遠岸殘桃賣酒家錯恠東風欺老眼

我來原不爲尋花

題蔡藜輝舫齋次峴老韻

風過溪來洒面涼一支健水出餘杭平分半幅疑看畫
難得三間恰向陽漁網愛牽簾影動釣絲閒拂水花香
浮家倘許來相就剪取橋南疋練光

從湖州至四安舟中大雨

山迴兩崖高路盡一川狹春流不盈尺野艇容恰恰正
賴急雨來須臾同放牖孤篷支兩膝兀坐如被壓問路
屢見給方言亂鵝鴨紆遲終到岸我有安心法首路又
登山回頭憶清雪

雨中過九里岡

平生狎濤江老怯風波惡茲游特改路意取山行樂一
咲我命窮天公大戲劇朝來發古鎮苦雨若赴約肩輿
煩兩夫蹉跌防失脚山山勃姑叫泥滑石齮齧漸上九
里岡險如出劒閣我本村野姿浪遊因落魄無端役人
力揣分非所托稍待天放晴前林候乾鵲勞生就徒步
庶免中心作

廣德州

山勢豁一州中央據行土地當江浙會開拓自洪武長
興環其東外捍等于櫓西南界宣歙兀突重巖俯長江
乃北門集慶倚堂廡當年耿鄧功拱翼事真主張吳勢
雖偏力絀不得取時危有鬪爭事往失險阻如今城下

路日夜走商賈獨有好事人登城尚懷古

連日風雨山行頗有寒色

盤旋八九里下上千百尋身在雲氣中不知山淺深雨聲挂奔瀑風響交長林空谷早晚寒颯然作秋陰初疑春不到忽有啾啾禽

飲十字坡茶菴

連岡踏成泥山骨似無石汙池之所緒土赤水亦赤瓢漿乃時需解渴聊飲血一飲不自持吁嗟遠行客

紅林橋

山花不知名山島多聚族深村窅然入樹影散晴旭人家石橋邊共吸一溪淥年豐旅食賤市遠無魚肉但覺

松毛香茅簷燒筍熟

宣城道中喜晴

宣城古郡風土嘉就中最樂惟村家我來正值積雨後雲氣解駁生晴霞岡巒過盡徑路坦溝洫流去田塍斜新茶未焙穀雨葉早稻已茁清明芽長鬚搖風翻宿麥新翠著地鋪胡麻柴門相接綠陰裏籬落綴以朱藤花迴思連日走旋潭若涉大海無津涯人間乃復有此景始覺大地猶春華

曉望敬亭山懷梅耦長孝廉

千峰含霧爭出沒惟有敬亭先得日相看不厭吾亦云可惜游踪難自必都官詩派誰復論家法傳與長身孫

孝廉詩好畫亦好不愛城市居山村昔在京華曾倒篋
看畫求詩情頗狎入山不訪住山人古者論交無此法
山川興到尚可乘他日重來能不能作詩為報句溪叟
聊記吾曾過宛陵

高嶺菴小憇

再上已無路中休宜有菴花陰移客座松氣接僧談俯
視風斯下端居戶正南一泉香積味慚媿荷分甘

渡清弋江

一曲清江抱白沙牧之佳句舊曾誇乍離古渡舡如葉
初換春衫客憶家遠處人烟連竹色晴來村店忽楊花
亂山青過陵陽路遙指雲頭辨九華

飲劉濂菴光祿慕園二首

恬澹知君性中年早罷官自耽泉石趣轉覺世途難為
我開花徑携樽就藥欄肯辜楊柳月深坐到更闌
此來吾有幸別圃得春光地主留花待詩情被酒狂欸
門煩兩使愛客到諸郎千里能相就何須置鄭莊

南陵早發

林深葉密曉冥冥旭日初啣霧未醒小店門開惟土竈
一菴僧閉但茅亭秧從布穀聲中綠山向畫眉啼處青
獨與野樵爭路入偶逢釣叟覺魚鯉

山家柴柵編竹而不築墻云以拒虎虎能喻墻
而不敢窺籬蓋疑其為陷穽也作虎落歌

危巖下瞰千仞壑猛虎騰身只一躍東村黃犢西村羊
入室踰垣恣饕虐山人不以墻禦虎插竹成籬用藤縛
目睛如炬不敢窺疑是中間伏機獲天生人智爾則愚
咆哮作力胡爲乎不知此法自誰創陰絕覲覲真良圖
周防莫遣樊籬破與虎爲隣可高臥

蕎麥灣大雨

蹇驢蹙蹙牛蹄重雨脚斜飛密無縫雲蒸霧氣取境迷
泉挾雷聲撼山動詩人好遊復好奇衣沾履濕去不辭
人生行路難如此偏在溪山最好時

山店阻雨次徐任可韻

長程愁冒雨小市喜臨橋旅飯留人住征衣借火燎溪

喧窻逾靜吟苦膝頻搖莫作衝泥去尋山不在遙

行經九華山麓欲登不果任可有詩戲次其韻

玉池瓣瓣蓮石角株株筍去天纔一握豈可尋文準一
百六青峰峰峰入吾眵終焉就埋沒雲霧諒不忍天如
憐詩人久被陰雨窘雖非鸞鶴姿稍異蟄蟲蠢撥雲使
就道迴馭控鞅勒我僕忽告勞從旁乃微哂平生汗漫
遊衰暮興易盡向來徒碌碌臨去猶惓惓寄語雲中人
塵寰終遠引他年香案吏名籍倘未泯

碎石嶺詞

黃泥岡頭白日黑竹雞一聲石盡扞杜鵑勸客不如歸
鷓鴣阻人行不得居人慣聽不覺愁一蓑背雨唱歌去

我與爾同風馬牛

初至皖城喜遇同年姚別峰兼招程松皋舍人
宜城渡頭三月尾荻洲新漲河豚起片帆帶雨剪江來
意外班荆得姚子人情得隴每望蜀便想同時兼兩美
作詩更欲招之罟東向樅楊寄雙鯉大龍山頂龍眠麓
起伏尻雕百餘里晴光欲動草翻烟春事將闌花潑水
君能命駕姚亦留猶及同看紅藥蕊

程松皋得余所寄詩即夕自桐城命駕過皖次

東坡喜劉景文至韻

偶然折柬相招呼起聽雙鶻鳴庭隅知君與我不遐棄
古義鄭重今人無肩輿西來二百里疾足遠致兩僕夫
歎門大咲發狂喜履齒忽折行須扶余頭漸添種種髮
君領競長鬢鬢須別來三歲遽如許尚不作達寧非迂
勿嫌江城春已晚百物生意咸昭蘇梢頭紅藥若有待
含語未吐真名姝烟花滿前太狼籍風雨賴汝能支吾
有情相對且盡醉只恐酒醒仍江湖

懷寧劉東臯明府招飲薔薇花下

江城十日九日風遊絲落絮飄晴空春光却在令君宅
別館布席依芳叢竹籬半庭添曲折葉幌一架穿玲瓏
不知花頭幾萬朵但覺香靄浮簾櫳晚霞烘天鶴頂赤
杯面倒影魚鱗紅小胥抄詩浣清露狂客噓氣攄烟虹
人言簿書妨作達正坐才短心憧憧如君治劇本閒暇

豈有塵霧能相蒙神清政簡若無事佳興自與遊人同
不辭小戶徑霑醉髣髴置我葡萄宮酒闌更話十年舊
獨惜座上無車公

朱梅人與劉同
邑交好故云

三月二十九日賦餅花

客中春忽盡僧舍少嘉樹野草着幽花荒庭邀一顧
瓶貯遠汲紅紫插交互雖深攀折憐且免風雨妬新枝
若矜寵昨者便成故也復有遊蜂窺尋入窻戶沾泥落
衽席等是閱朝暮微物感吾心流光去如鶩

晚晴登安慶城樓

浩浩風聲晶晶沙大江東去日西斜雄關地脉來千里
古郡山頭有萬家一鳥帶烟投皖口亂帆如葉點楊槎

最憐落拓重遊客獨倚高樓看落霞

同年左子畏家上臣各有魚米之餉詩以報謝
裹飯初來似赴虛可能彈鋏賦歸與故人館俸慚供米
久客江城愛食魚垂餌欲分鈎上粒勸餐恐有腹中書
頻年自識勞薪味指動無端忽累渠

與子畏上臣飲楊令詒孝廉宅

映門新漲碧鱗鱗步履相過近有隣江上萍踪三月社
意中雲樹十年人傾來竹葉休辭醉飛到楊花不惜春
曾是東風同下第每逢高會易傷神

寓窗書所見

孤城低壓青山麓人在山樓正倚窻忽有一帆移樹杪

始知花外即長江

僧房多鼠戲次青丘集中乞猫詩韵

物以黠著名其性故狡獪詩有穿墉譏史徵渡江恠兩
端持首尾同穴爭勝敗宵行競睚睚晝伏避噲噲飲河
恣取滿食角忽入隘寧拚五技窮肯守一貪戒客來寓
閒院古佛同破解下榻地無多群來擾我界迎猫古有
訓攫噬異大快香積乏魚餐餘蔬雜饘餲公然掉尾去
竄瓦等歷塊坐長鼠輩驕法門幾大壞聲疑蝙蝠叫惡
甚蠅蚋嘍齧綫衲旋穿汚几經屢曬懶禪倒頭睡并少
沙彌誠龕燈乍明滅慣伺神力憊客主滿堂中欺人盡
聾聵老夫非不聞恥與鬪機械逝將歌去汝鞍馬早可
鞞聊復忍斯須歆眠發長噫人間老吏多斷獄豈盡賣
磔之肆階下微命直草蒯害有大於斯么膺法猶解豺
狼問當道此語堪下拜

皖城遇張損持庶常

別君四年前養痾臥鄉井繼聞君遠出訪舊歷鄆郢藥
裹煩關心川長徒引領何期皖城下邂逅歸帆整春江
展明鏡照見兩人影一訊眠食佳再看詩句警所欣神
氣旺餘力出鋒穎男兒鬪身強即事有循省我貧甘瓠
落踪跡雜蛙黽君本青雲姿霜蹄早已騁姓名上館閣
著作富彪炳間亦事清遊官情冰雪冷却將燕許筆收
斂耳目景自咲捲波瀾人誰測千頃猶然荷降氣采取

到頑曠故交豈不多幾個念萍梗迂踈踵後悔窮老戀
真境且盡十日歡歸期敢遽請

答婁東曾蘭坡次唐實君考功扇頭舊韻

唐庚

謂東江

吳質

謂元朗

並詞壇珂里流風尚未殘白髮江

湖稀老伴青韶朋舊半高官千金買賦愁何益二頃求
田計果難慚媿新篇謬推轂故應仍作布衣看

任可將歸有詩留別次韻奉送三首

來何草促去何輕話到臨岐百感生並轡山程驢沒淖
對眠禪榻鼠窺檠豪除湖海陳登氣老傍江關庾信名
行李累君吾轉媿不曾彈鋏為魚羹

欲解孤舟又斲維留行無計且遲遲夢回風雨春將老

興盡江山句益竒萬事到頭難逆料獨行何地不相思
人生只有情難割容易并刀剪亂絲

胡麻好種盍言歸悵望郊園白板扉隨水孤萍無定所

時余又將往益城

出巢雙燕又分飛鄉音伴我人餘幾家慶如

君世絕稀也道此番非遠別不知何事倍依依

損持見和前篇再疊韻奉酬

君才如轆轤倒捲百丈井運斤乃成風巧斲無匠郢和
章出神速佳處心獨領鬪險初以竒好暇仍用整余姿
實駑鈍何敢望鞭影未免竭蹶趨因君聊一警終焉免
冠謝老秃管城穎有顏知自慚在痛無不省稍窺作者
意此事力難甞一生坐好遊四牡蹙靡騁忽悟旋已迷

不文焉用炳北風吹短褐暖律中微冷逝收汗漫蹤少
補桑榆景烏健叱兩角碧沼開半頃欲回焦穀芽如鑿
石田礦賦才亦分定造化豈可梗君苗硯欲焚邊幅窘
詩境詞華公等事稼圃吾所請

同損持任可步入一指巖

借居古寺如雞埒破窻無紙戶礙看庭荒草蕪一無見
臥聽別院鳴黃鸝故人敲門不暇嬾邀我近出同尋詩
平岡路轉百餘步忽有曲徑穿疎籬春光已殘夏方淺
景物正及清和時新篁飄箨雨藪藪老樹吹絮風披披
石榴初綻的皪葢勺藥未吐婀娜枝三間精舍好位置
高下恰與林巒宜寓居纔隔一垣耳向所未到今追隨

自慚百事坐頽廢覽勝亦荷同儕貽

酬詩僧愷月

十日吟牕悵獨凭不知同舍有詩僧感深逆旅皆為客
快比西南乍得朋芳草一簾花外磬綠陰半榻雨中燈
從今便結尋山伴我着芒屨爾擔簦

詩筒為損持賦

誰將圍寸竹截作徑尺筒粉筠削盡肌理出玉質外瑩
其中空為君滿貯詩千首投以琅玕報瓊玖寄去寧煩
六六鱗捧來須得纖纖手

周通守劉明府惠鮓魚感賦

江橋市氣鯉細瑣雜鯁鰻鱓及子鱗邂逅適我願鮓

魚乃海味族類去人遠無端四月初來就捕魚堰成群
吹柳絮力小波濤困高價買銀刀充庖復奚恨千錢易
一尾奇貨居負販何當地主情絡繹餉懦鈍於余誠過
分爲爾勉加飯憶昨京口城南包充北獻 至尊珍七
筋官長申重翼千艘網夜集卅驛沙晨歎爭致五侯鯖
誰焚百金券自茲遂成例難以什伯論乘時規盡取挂
一肯漏萬遺落偶人間搜羅又焉遯生平持竿手意釣
本無悶竭來江湖遊飽食慚頓頓仁人砧几憐豈獨泯
恩怨竭澤慎須防擊鮮毋久恩

登迎江寺塔同程佐衡作

江山本無窮遠景域近見凌空得古塔覽勝斯獨擅方

當賈勇登寧計足力倦一層一喘息屢上屢迴旋漸覺
所歷高團團目雙眩大龍鱗甲動掉尾曳匹練東沈九
子烟西掣五老電日光盪浮氣顯晦呈千變何來萬斛
船初若葉隨片須臾到城下見鴨依稀辨應有舟中人
回頭望雲巘江心拍倒影了了識我面多生幻妄緣顛
倒徒自炫不如且蹙憇萬象付虛眄直作御風行冷然
有餘善

次韻畚劉東臯

展翼須大風負舟視積水我無二者力於義昧知止魚
鳥兩忘機波流任縈委蹉跎不自覺憔悴今老矣華髮
映青衫無由脫塵滓近携詩卷出聊復向江汜邂逅劉

文房清吟壓錢起君家五字城藝苑久擅美千鈞斬麗
角八扎洞犁耳也似奏牛刀砉然入腠理專家尚難到
碌碌况餘子不謂簿領中兼長乃有此訟庭懸一鞭容
座設四簋文書日堆案遮眼愛經史咳唾隨口成珠璣
誰得似猥蒙獎許及欲報慚何以君本大夏材干霄養
桐梓交章岳牧薦名姓上九齒猶復滯河陽年年種桃
李譬諸閒草木臭味在蘭芷廊廟亟需才遠琛棄西珥
築臺牧駿骨應自郭隗始班超筆未投卜式爵爭徒輸
邊半文吏磨盾雜象弭曷不走從軍尚堪作嚆矢

用班超傳

中語
三疊前韻答程佐衡

吾黨得程生紛綸五經井變風欲刪鄭高調乃和郢跌
蕩到文壇鸚鵡可獨領談辭聽奮發儀度看修整實至
名斯隨有如燈取影昔年入太學都講拔清警衆中頗
不凡揚藻謂見穎淒然經報罷徒步告歸省余時亦客
燕瑁操語交黽鴻飛豈顧弋馬繫終思騁內熱聊飲冰
寧堪膏自炳至今清夜夢一咲齒為冷小別曾幾何雙
丸劇馳景回思十年事倏忽若未頃君猶錐處囊我已
鐵錮礦向來期許意土偶遇桃梗正賴好江山鬱紆豁
竒境明朝有高會徑造不待請

來日約遊大觀亭

弔元左丞余忠宣公墓二首

王氣江東五彩雲上流假手緩游氛若教京觀同時築

誰表孤忠異代墳僭號無成終是賊殺身得地孰如君
到頭此事關天幸不死吳軍死漢軍

殘局何須論上都一軍援絕勢真孤江山故壘殘骸在
社稷中原尺土無計定全家爭赴難時危幾個肯捐軀
他時謫守含山廟媿殺生降一老儒

用危太朴事

佐衡置酒大觀亭招同損持蘭坡志鄴分韻得

嵐字

故人置酒城西南携我晚登百尺嵐大觀亭在喬木杪
鵲巢近檻俯可擲短墻截斷萬家井惟見遠景浮青藍
海門一關三百里白馬南下無停驂南江勢與中江合
一折滙作蛟龍潭孤亭如山撼不動影入明鏡光泓涵

舟人水鳥互出没去者兩雨來三三夕陽欲沈沙岸樹
疎磬忽報隣僧庵主呼痛飲客徑散要令耳目留清酣
宿松朱字綠博學嗜古所葺南岳考三卷援據
往籍至數萬言而斷以已意大要謂古之南岳
乃灑之天柱峰非楚南衡山也頃於皖城官舍
出此見示索余題辭作歌贈之

皖中竒士推朱生文采奕奕千夫英手持一卷南岳考
筆力獨舉千鈞輕首援六經證據確旁及百氏搜羅并
尚書兩篇列四岳惟有泰岱名孤撐北恒西華南則霍
疆域錯見因圖經厥初相距道非遠天子一歲周巡行
後來漢武禮天柱荒邈不及衡州衡可知灑岳即南岳

語雖似創辨頗精君家近住此山下高論直比山崢嶸
火維一神欲易位此事乃可口舌爭我思鴻濛肇開闢
群山綿亘誰指名自從肆覲加望祀錫以封秩同公卿
神靈豈邀軒冕貴世俗自炫壇墀榮界連郡邑互引重
事出讖緯多紛更陋儒聞見溺沿習幸免流輩相譏評
如君特識那易得我不爾怪旁人驚昌黎南遷偶失考
詩句聊紀衡陽程他年重續輿地志待爾著述名山成

敬業堂詩集卷二十一

敬業堂詩集卷二十二目錄

中江集

久客皖上將之江州劉東臯以詩見送次韻留別
酬別高雪亭

峰兄弟

黃石磯

重泊路灌溝憶十八年前曾阻風於此

蘆洲行

花洋鎮阻風望小孤山借

東坡慈湖峽五首韻

避馬當之險從磨盤洲經沙灣至喻家洲

阻風小孤山北晝夢家園牡丹盛開醒而聞鷓鴣

聲戲成一絕

遊小孤山二首

并序

午日重登庾樓和朱恒齋太守

次韻酬南昌葉素我

淦城喜雨

題恒齋太守春江載鶴圖小影次韵四首

發潯陽訓恒齋贈別二首

重過湖口望五老峰 赭磯雨泊

彭澤阻風追憶壬申舊遊寄朱恒齋九江魏昭士

寧都

曉晴過馬當

大雨泊東流城下食頃放晴二首

夜泊吉陽湖

曉發望江岸晚至樅陽

樅陽僧舍消暑七首

過青山弔田間先生示懷

永懷玉兄弟及令姪廷益三首

順風過池口

大通舟中看雨

六月十五夜紫沙洲對月

當塗道中

晚登高淳縣南水月閣

渡高淳湖

從泝練出西沈二首

九龍山下人家

初登惠山酌泉

六月廿三歸舟過荷花蕩口戲作

常州道中紀事二首

春間從吳興買藕寄歸種

園池中今歸自皖城白蓮已試花徘徊池上有

作

顏學山學憲招同劉坡于

林碧山沈昭嗣湖舫燕集

九日同趙蒙泉項霜田楊次也泛舟西湖登孤山

和蒙泉作二首 唐考功東江為仇滄柱編

修禮闈所得士今來典試吾浙出闈後為湖舫

雅集邀余奉陪即席和蒙泉韻二首

題吳紫萼所藏吳白畫設色金銀花

秦郵道中即目 舟經寶應居民被水者多

結茅於堤上故廬漂沒不可問矣

季冬朔日渡黃河 王家營旅店遲楊次也家

東亭不至 紅花埠遇雪

雪後蒙陰道中 張夏旅壁見德尹隋車傷

拍絕句戲次原韻三首

趙北口夾堤柳陰最密不知何故忽被斫伐存者

惟枯椿而已感歎成詩命兒建同作

白溝旅店見甲戌冬杪題壁詩談是山繼和一首

再次前韻兼寄未庵

敬業堂詩集卷二十二目錄終

敬業堂詩集卷二十二

海寧查 慎行 悔餘

中江集 起丙子五月 盡十二月

留皖城兩閱月九江郡守朱恒齋枉札見招復買
帆溯江而上又踰月乃賦歸按禹貢有北江中江
之名皆在彭蠡東孔氏傳以入震澤者為北江則
古之中江當在皖口以上湓口以下今湖口一縣
當江湖之滙與經文所云東池北會為滙東為中
江者正合而正義引地里志乃指為震澤之中江
竊恐不然輒据所歷攷正焉

久客皖上將之江州劉東臯以詩見送次韻留

別

大小孤山色西南兩點烟獨携孤枕夢又上九江船岸
濶沙沈樹風狂浪拍天感君投贈意臨別倍依然

酬別高雪亭

五年經遠別一月又將離捷徑人皆驚頭銜爾未移

雪亭

為桐城令九年矣

上官須善事衆口莫相疑但去沽名意後來

終見思

皖城早發却寄姚君山別峰兄弟

又背孤城去驪歌不忍聽薄遊逢地主久住為山亭月
黑江光動魚跳霧氣腥檣烏啼最早愁鬢轉星星

黃石磯

水淺舟膠細作鱗半篙撐過石粼粼風傳茅店棟花信
山作畫家荷葉皴

王濛畫法也

鼓角自鳴孤戍壘江湖暗老

獨遊人郵籤不用長年報熟路重來免問津

重泊路灌溝憶十八年前曾阻風於此

沙嘴沿迴又一灣人家初在淼茫間帆生浦口霏微雨
岸走雲根斷續山芳草迎船依舊綠白鷗如我幾曾閒
可憐路灌溝邊柳暗閱勞生六往還

蘆洲行

江干積薪如列屋巨艦裝來聯萬斛天生此物充正供
歲歲陳根發新綠舊崩沙岸冊未除新漲荒洲報方續
三年一丈久成例增減何曾量盈縮不知此課起何年

坐待摧枯濕同束我聞王政有遺利藪澤閒田聽樵牧
如今尺寸籍農丞作俑必由桑與卜踏地輸租爾勿慳
逃空那得出人間但看歸雁知人意不敢啣蘆徑度關
花洋鎮阻風望小孤山借東坡慈湖峽五首韵
積水西南一眺空海門遙在有無中行人已達大雷岸
好借半帆潮信風

遠色蒼然近晶然鷺鷥衝破夕陽天烟江疊嶂無人畫
一硯題詩落眼前

魚網漸收沙際市酒旗猶綽水邊扉青裙縞袂誰家女
日暮一砧來浣衣

萬竅爭號怒未融輕篙弱纜總無功老夫只作叅禪坐

定裏松濤起半空

小孤知我重來意先向江心轟片帆為報白頭猶健在
擬尋初約上巉巖

避馬當之險從磨盤洲經沙灣至喻家汊

清江吐白沙去岸二三里小艇泛舸艚團團磨旋螳江
豚鼓鬚鬣蕩南風起篙工群作力進尺退或咫尺馬當
突兀來石狀恠且詭半為鬼斧劈倒插截其趾白鷺導
我前依依投別汜紆途雖較遠脫險差可喜輕生涉波
濤鹵莽迫暮齒前非踵知悔恐懼及茲始

阻風小孤山北晝夢家園牡丹盛開醒而聞鷓
鴒聲戲成一絕

群仙一味嘲輕脫故引名花入臥遊却被鷓鴣呼客起
黃蘆苦竹近江州

遊小孤山二首

并序

大江經湖口縣合彭蠡之水達於皖口禹貢所謂中
江也小孤山屹立於其中當盤渦激湍之匯雖好事
者亦罕游余過此數數矣至輒風濤間作丙子四月
杪從安慶溯江而上連遇西南風舟行濡滯五月戊
午黎明發喻家洲刑牲默禱須臾風止余竊喜曰登
山夙願也神其許我乎亟令榜人剪渡山形三面懸
峭惟西南一角橫石坡陀首受分派其下洄流可以
弭棹攀磴北上劣僅容趾凡百餘級入洞門折而東

鐵柱在焉稍西為神女祠再上為大士閣從神女祠
西北上兩旁峭壁中穿石罅如入螺殼中背東面西
已復折而北路盡一亭翼然行者必少憇以蘇喘息
然後躋絕頂焉山之顛遠而望之初若半圭已而如
拳如髻至此乃知其中分為二也環而計之東西北
皆方南獨圓南北長二里許東西得三之一東麓距
岸約四里西麓僅三之一山之大概盡矣既序茲遊
之始末又綴以二詩夫有所感也

一綫長江直向東可無拳石兀當中僧窻坐湧千帆日
客袖來當五月風筋力將衰酬夙願波濤不拒賴神功
山雲海市尋常事敢擬韓蘇說感通

鳥道羊腸盡坦途身先僮僕作前驅能為砥柱何妨小
不傍群山轉愛孤江海一關留鎖鑰金焦兩點闢門樞
從他萬口流傳誤肯許彭郎作配無小孤山神之為女
郎不知始于何時
歐陽公歸田錄稱小孤在水中巖然獨立深巖轉孤為
姑為俚俗之說然東坡詩小姑前年嫁彭郎則宋以前
久承此
譌矣

午日重登庾樓和朱恒齋太守

已上孤城又上樓使君高宴最風流重來湓浦逢佳節
閒對廬山話昔遊畫鼓綵纏爭渡楫曉粧紅插半開榴
賞心事事多非昔不獨思鄉易白頭

湓城喜雨

塋田長苦旱

九江民俗呼遠水田為塋田近水田為龍田塋讀作胖上聲

炎夏方蘊

隆坐看匡廬雲出沒千萬峰不肯作霖雨厥占歲當凶
天心有轉移夜枕聞靈籟火光出飛電起螫鞭潛龍朝
雨忽滂沱雲來相附從偶然得際會似欲貪天工野人
本無心詩語出至公旱吾不汝罪雨亦非汝功

次韻酬南昌葉素我

寥寥海內幾同心此事終緣臭味深乍喜芝蘭留獨賞
每談風月輒相尋數篇為我開詩戒一語從君進酒箴
惆悵琵琶亭畔柳中年聚散最難禁

題恒齋太守春江載鶴圖小影次韻四首

麴塵濃綠染初勻紅杏村邊雨洗新不向春江看畫橐
誰知太守是詩人

也如泛宅也浮家畫舫移陰柳半遮好與茶山留故事
閒封遠信裹青紗黃山谷以青紗蠟紙裹茶寄人不
過二兩廬山產間林茶故借用之
自飲廉泉不願餘更留何物件琴書仙禽最得貧官意
未肯臨淵便羨魚

一群紅掌漾清波官閣詩成記放鵝恒齋有
放鵝詩斗粟累人

添鶴料二千石俸近無多今年官俸
俱充兵餉

發潯陽謝恒齋贈別二首

遊踪宦跡並沈淪管鮑交深在一貧小別星霜經五稔
遠來風雨又三旬弟兄托契情原厚兒女相關意倍親
料得他時了婚嫁兩翁俱是白頭人時與恒齋初
結兩姓之好
攀轅截轡去何之廉吏誰云不可為風月招邀蓮社酒

江山開拓庾樓詩官情向冷憂還喜苦語臨分頌亦規
莫聽琵琶空洒淚清名難得九重知恒齋已挂吏議
奉旨特留

重過湖口望五老峰

又挂輕帆過石鐘有情難忘是遊蹤風痕忽散一湖浪
雲氣愛迷五老峰此日舟中回白首當年天半倚孤筇
衰遲定被山靈笑歷險探竒漸漸慵

赭磯雨泊

午汗翻漿晚未融雨聲夜入荻蘆叢孤舟野岸少嘉樹
六月大江多暴江湖舟人
呼作報風蚊響似為雷助勢螢光敢
與電爭紅等閒何用生分別多付微涼一枕中

彭澤阻風追憶壬申舊遊寄朱恒齋九江魏昭

士寧都

綠楊陰裏幾家烟小縣重來記往年劈紙風流看駐節
隔江雲樹識歸船故人久別稀書札太守新聲在管絃
欲上旗亭無酒伴鬢絲愁絕杜樊川

曉晴過馬當

風止波猶鳴空江蕩餘勢千帆散萍點飄轉豈有帶夏
雲少媚姿突兀拔空際小孤曉粧就回首露寶髻但覺
兩岸移寧知一川逝詩成枕席上出語如噴噓境過旋
已忘中流方鼓枻

大雨泊東流城下食頃放晴二首

沙頭初繫纜船尾忽聞雷高浪吞天去長風帶雨來近

城嵐氣合對岸夕陽開六月川程惡陰晴日幾回

只有青山色差宜雨後看天心今若此行役倍知難翠

柳騎牛岸清流浴鷺灘不逢陶靖節誰肯說休官

東流古彭

澤也

夜泊吉陽湖

酒旆當門柳拂船雨餘一帶好山川漁村吐火江初練
葦岸沈鈎月未弦風進微涼知夜永客歌孤枕覺秋先
亂蛙最是無情物苦向荒灣聒醉眠

曉發望江岸晚至樅陽

中流沄沄浪作花輕帆南下整復斜家書曉報大雷岸
客夢夜落長風沙船頭一轉二百里水面忽浮三兩家

烟收霧散目力短白鳥飛去移蒼葭

樅陽僧舍消暑七首

樅陽古重鎮六代推繁華軍府建旌麾居民十萬家自
從郡邑改夾岸惟蒹葭誰知近水市客饌無魚蝦

古刹聚劫灰入門尚茅茨曾經上番住徑造不見辭短
墻日就頽故榻猶未移闍黎頗好事指我壁上詩重來

亦偶然翻觸徂年悲

壬申客樅
陽曾寓此

昔與錢少陽茲焉互酬唱頻為文字飲屢荷雞黍餉別
中兩寄書松竹問無恙答言吾老矣後會恐難望世薄

風氣衰老成果殂喪田間一茅屋過者今悽愴

傷錢飲
光先生

道楷本名僧文士相往還築居傍闌闔長苦不得閒遠

客寡交游避暑來掩關汝出我居守嗒焉似空山

庭空白日長竹樹森成林彼當炎歊氣我受清涼陰北
窻多好風時時中衣襟長恐俗子覺叩門來足音

客贈贛州蘭幽賞自矜貴遠遊無長物為爾添一累月
明看露光人靜覺花氣提携成老伴一咲吾臭味

老夫方晝眠風雨來縱橫欠伸得餘味群動了不驚電
影搜破壁謂是吾眼明雷聲殷空牀謂是吾耳鳴須臾
萬竅寂殘夢續復成

過青山弔田間先生示懷永懷玉兄弟及令姪

廷益二首

田塍高下路欹斜小雨濛濛早稻花到此不愁迷失道

讀書聲裏是君家

絮酒何辭觸熱過依然廢瑟在巖阿較他短笛山陽泪
三世論交感更多

存亡出處總相關惆悵燕臺客未還滿架遺書付君輩

天教風雨護名山

時越秀客
遊京師

順風過池口

舸艚船上南風急好片池陽雨後天九十九峰青不斷
白雲蒸出九枝蓮

大通舟中看雨

南岸雲埋山北岸雲出岫乘時各行雨天本無私覆豈
知倉猝間中有龍蛇鬪當其鬪未合中流猶白晝南勢

漸北侵渡江躡窮寇馬牛殊順逆蠻觸爭左右北風忽
不競退縮示免胃坐聽南風狂蛟涎捲奔溜雷公與電
母飛檄亟相就盡助昆陽圍誰為鉅鹿救須臾賀戰勝
兩點隨其後的鱗走明珠淋浪撒金豆魚蝦半空落虎
豹或驚仆我窮客江湖境險迫邂逅聞中閱造化觸目
誇日富吟成看雨詩蓬隙日光漏

六月十五夜紫沙洲對月

檣船古柳岸江濶風吹裳快哉雷雨餘復此終夕涼清
波洗着目白露入肺腸炯然孤月明漏此一掬光願從
魚鳥住永與江湖忘

當塗道中

六月江路惡驚濤戒舟杭挂帆入支河如馬馳康莊雨
過禾苗齊風來蒲稗香平灘立鷗鷺淺草眠牛羊宛宛
柳拂渠修修竹遮墻時見荷耨叟休陰坐微涼游子久
離家歸心日夜忙寧知此間樂風土近故鄉

晚登高淳縣南水月閣

偶爾經過偶泊船偶登佛閣亦隨緣一茶不負居僧意
留我西窻看稻田

渡高淳湖

曉程貪穩睡天色尚濛濛人語蓼花外鳥鳴菱葉中舟
稀知路僻水淺賴潮通脫盡江湖險朝來不怕風
從泝練出西沈二首

到此無風也自涼繞身四面是湖光舟人遙指宜興縣
孤塔對舩如筍長

蘆灘淺處作人立白鷺一群如白衣何事近舩還引避
故應慚我未忘機

九龍山下人家

小屋疎籬透晚涼亂蟬啼處正斜陽綠槐樹底通頭女
風過微聞抹麗香

初登惠山酌泉

九龍蜿蜒來垂首倒吸川歎雲洩乳竇至味淡乃全我
携陽羨茶來試第二泉山僧導我至古木枝叅天不知
闕幾朝仰視皆蒼烟陰此一眼碧自然得澄鮮出山豈

不清真贖恒相懸餅罌列市肆例索三十錢挹注苦被
欺向來殊可憐會當置符調此法休輕傳

六月廿三歸舟過荷花蕩口戲作

綠水紅蕖連夜開明朝多少畫船來歸人合被遊人咲

揀取花前一日回

吳中風俗六月廿四日士女遊荷花蕩

常州道中紀事二首

一丈黃泥浪郊扉尚有痕孤城經雨塌百瀆被湖吞鵝

鴨回頭失蛟龍掉尾渾亂帆如白鷺點點稻花村

暴漲衝橋斷騎牛當渡船築塘連絕岸岸水出低田沈

竈蛙魚入疎籬荇藻懸天心人不測容易說豐年

春間從吳興買藕寄歸種園池中今歸自皖城

白蓮已試花徘徊池上有作

廢圃遺利多污池荒一畝養魚飽賓獺棄作葭萑藪計

窮乃得變水淺規種藕種藕利稍遲事在三年後先為

看花計於義微有取呼兒移竹榻謀婦出斗酒舊來小

池亭頽圯惜已久

池南向有石亭亂後燬於火

艱難生理窄一醉還

家偶結茅何時成惆悵回白首

顏學山學憲招同劉坡千林碧山沈昭嗣湖舫

燕集

京國頻年散素心湖山一夕盍朋簪笙歌隔座通荷氣

臺榭移舟過柳陰解后不愁佳客少往還誰似故交深

只慚當路憐才意猶許方干作醉吟

九月同趙蒙泉項霜田楊次也泛舟西湖登孤
山和蒙泉作二首

清醪盈樽蟹劈黃故人有約作重陽啼殘楓樹鴉翻陣
影拂蘆花雁起行此日烟波還命侶去年風雨正遊梁
回思南北勞勞路翻怪登高得故鄉

涵碧橋東畫舫停遊人多上御碑亭樓臺頓改才人
畫丘壑潛移處士星紅葉晚燒諸寺赤碧天秋縱兩峯
青詩翁老去狂猶昔肯向湖山更乞靈

唐考功東江爲仇滄柱編修禮闈所得士今來
典試吾浙出闈後爲湖舫雅集邀余奉陪即席

和蒙泉韻二首

前輩風猶在斯文寄不輕歐陽爲座主蘇軾得門生一
月了公事三秋多勝情旁觀爭太息誰不重科名
錦纜牽官舫餐錢費客庖酒開清箬甕橘拆洞庭包霜
嶺將楓葉烟堤尚柳梢湖山君作主何地置貧交

題吳紫萼所藏吳白畫設色金銀花

天公省事厭紛華澹白微黃本一家却被毫端勾染出
無端分作兩般花

秦郵道中即目

以下十月
北行作

不知滛潦齧城根但看泥沙記水痕去郭幾家猶傍柳
邊淮一帶已無村長堤凍裂功難就濁浪侵南勢易奔
賤買河魚還廢箸此中多少未招魂

舟經寶應居民被水者多結茅於堤上故廬漂沒不可問矣

蛟涎魚沫奪殘黎收復流亡賴此隄寒比蟄蟲宜瑾戶忙如巢燕正爭泥雲沈雪意千帆合天壓湖光四面低好與官家勤畚鍤免教歲歲逐鳧鷖

季冬朔日渡黃河

是日河水合而復開土人名曰凜凌

崑崙萬里來盛氣日盪決嚴寒一稔斂流汞變積鐵下容蛇龍臥上少螻蟻穴風雨過輪蹄雷霆駭魚鱉河神不敢偵縮頸比蟲蟄東風昨夜至氣候改栗烈忽開無底竇書與厚地裂將毋銀山崩散作萬堆雪小舩晨喚渡投間伺其缺虎齒齧兩旁羊腸迴九折中流倘失勢

過涉慮頂滅篙師駮瘵痕手足互流血非無白日照煦汝乍煖熱造化故無私寧為一夫悅客子衣裘單長途計尤拙歲窮迫行役既濟轉愁絕

王家營旅店遲楊次也家東亭不至

已過江淮半月期一行雁羽尚參差勞人相傍會同伴熟路頻經漸少詩急景欲回西日咲輕裝那免北風欺鯉魚信斷河冰合悶極寒燈照影時

紅花埠遇雪

記得芳時幾度經

自此至鄉城五十里間桃花最盛衝余甲子己巳與午皆于三月過此衝

寒明發又鄉城橋邊雪意詩催就鬢上冰花氣結成埃館迎來風北向鄉程讓與雁南征敝裘或有天憐分只

費殘冬半月晴

雪後蒙陰道中

日出天忽高山寒雲不附峰峰帶晴雪遠近畢呈露馬蹄碎瓊田蛇尾曳絲路草枯燒不盡白者疑伏兔饑鷹下攫之注目始知誤糾然鸞身上却立槎枒樹樹更僵於人咆哮風正怒何處問旗亭衝寒背城去

張夏旅壁見德尹隨車傷指絕句戲次原韻三

首

役車歲晚幾曾休斗酒何時與婦謀此意自憐還念汝一燈今夜白人頭

一咲驅馳老未休隨鞍如與少陵謀回思下澤車中客

不為封侯合轉頭

安穩生涯一醉休天全畢竟勝人謀人間險語何須鬪不說矛頭即劍頭

趙北口夾堤柳陰最密不知何故忽被斫伐存者惟枯椿而已感歎成詩命兒建同作

五度征鞍柳拂絲重來禿幹已無枝摩挲老眼還三歎看汝成陰又幾時

白溝旅店見甲戌冬杪題壁詩談是山繼和一

首再次前韻兼寄未庵

帽裹驚沙鬢點霜三年前記卸行裝天寒倍覺暮程遠酒薄不禁冬夜長吳語同來還有伴燕歌相和若無旁

詩成爲報君兄弟飛夢三更已帝鄉

敬業堂詩集卷二十二

第 35692 号

平成 3.11.22

聖和学

928

園短大

7

図書館

6

